

# LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

*Le guzxí' lu nĕ'ĕ Dios, isöl-lĕ'ĕ Dios Bö' Lá'ayi*

<sup>1</sup> Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tĕ le gusí lahuĕ' runĕ' Jesús, en rusédinĕ' <sup>2</sup> ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguiĕ' Dios Bö' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' gurö cazĕ'. <sup>3</sup> Gudödi gudí'i guzxáquĕ'ĕ Jesús, gútiĕ'. Ní'irö bubanĕ', en buluí'i lahuĕ' lógaquiĕ' gubáz queĕ' na'. Buluí'inĕ' légaquiĕ' zían le gulaca bĕ' zoĕ' nabanĕ', le cabí gaca nu tá'baga'. Zían luzuí buluí'i lahuĕ' lógaquiĕ' idú ca choá' dza, en bĕ'lenĕ' légaquiĕ' didza' ca rinná bĕ'ĕ Dios.

<sup>4</sup> Cate' ni' nacu'ĕ tsözxön, gunná bé'enĕ' légaquiĕ' cabí ulu'zĕ'ĕ Jerusalén. Jesús gudxĕ' légaquiĕ', rnnĕ':

—Guli'cöz ni' le guzxí' lu nĕ'ĕ Xuza' isöl-lĕ'ĕ queĕli' ca na' chibusiyön quézida' libí'ili'.

<sup>5</sup> Gunnĕ' ca':

—Le nácatĕ Juan buquilĕ' bönachi nisa lu nisa. Na'a bití' tse xidzé gaca queĕli' le ruluí'i yöl-la' ridila nisa ni, idisóalenĕ' Dios Bö' Lá'ayi libí'ili'.

*Ruhuĕpĕ' Jesús yehua' yubá*

<sup>6</sup> Ní'irö yugu' bönni' ta'yéajlĕ'ĕ Jesús, nudúbigaquiĕ' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bē' bōnachi Israel leyúbölö dza ni zóaru' na'a?

<sup>7</sup> Jesús gudxē' légaquiē':

—Biti' nequi queéli' inózili' bizxi dza o bizxi dzö' gunē' Dios Xuz le nuzóē' lu na' cazē'. <sup>8</sup> Sí'ili' yöl-la' huáca cate' guídē' Dios Bö' Lá'ayi idisóalenē' libí'ili'. Ní'irö gunlí' ba nalí quia' neda' lu yödzö Jerusalén, en idú luyú Judea, en luyú Samaria, en ga idxíntēli' idútē yödzölió.

<sup>9</sup> Cate' budxi bē'lenē' légaquiē' didza' ni, tsanni ni' tu'yusē' ca' Lē', la' buépitē' xitsá' ga rö'ö tu böaj le bucachē' Lē', ate' bítirö bila'lé'enē' Lē'. <sup>10</sup> Tsanni ni' tu'yúē' lúzxibalö cate' ni' buépē' Jesús, bulu'lu'i lógaquiē' chopē' gubáz lá'ayi ga na' nacu'ē, nácugaquiē' lari' chiguíchido'os. <sup>11</sup> Chopē' ni gulé' légaquiē', ta'nnē':

—Bōnni' Galilea, ¿bizx que ruyuli' lúzxibalö? Lē' cazē' Jesús ni si' guzē'ē ga zóali', buépē' yehua' yubá, lēasca' caní huödē' leyúbölö ca na' chibilé'eli-nē' söhuöjē' yehua' yubá.

### *Ta'bōē' Matías para tsáziē' xilatjē' Judas*

<sup>12</sup> Ní'irö gula'zē'ē ga na' rö'ö gu'ado' na' nazí'i le Gu'a Yaga Olivo, ate' yöjhuöjgaquiē' Jerusalén. Gu'ado' ni dē gála'sö ga dē Jerusalén, tsa nazí'gaquiē' lataj ta'zē'ē dza lá'ayi quégaquiē'.

<sup>13</sup> Cate' bulu'dxinē' yödzö ni', gula'benē' ga naca buropi cuía lu yu'u, ga ni' ta'cu'ē Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxí'inē' Alfeo, en Simón, bōnni' na' ruí'i ládxe'ē ladzē', en Judas, böché'ē Jacobo. <sup>14</sup> Yúgu'tē bōnni' ni tu'lidzē' Dios tsözxön, ate' yugu' böché'ē Jesús, en María, xinē'ē

Jesús, en ia'zíca'rönu nigula ca' núngaquië' légaquië' tsözxön.

<sup>15</sup> La' dza ná'asö guzuínë' Pedro gatsaj láhui'lö ga nacu'ë böchi' luzá'aru' na' ta'yéajlé'ë Cristo. Gu-laca idú ca xópalalaj bönachi nupa nudúbigaca ni'.

<sup>16</sup> Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnë' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zön Jesús. <sup>17</sup> Judas na' gubábalenë' rë'u, en bënlenë' rë'u tsözxön dxin ni. <sup>18</sup> Gula'zí'inë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë. <sup>19</sup> Cate' bila'yöni bönachi nacúa' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. <sup>20</sup> Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',  
en biti' idzöli nu soa yu'u na'.

Rnna ca':  
Nu yúbölö tsaza xilatjë'.

<sup>21-22</sup> 'Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacúa'lenë' rë'u cate' ni' buquilé' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

<sup>23</sup> Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. <sup>24</sup> Ní'irö bulu'lidzë' Dios, ta'nnë':

–Xantu' Dios, nunbë' cazu' icja ládxi'do'gaca yúgu'të bönachi. Bulu'í netu' nulë' chopë' ni chigurö cazu' Li' <sup>25</sup> para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni bunitië' xilatjë' tu' benë' dul-la', ate' guyijë' xilataj cazë' lataj chul-la.

<sup>26</sup> Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'béajë' tu, ate' birúaj le nazúaj lé' Matías. Caní guca, Matías na' gubábalenë' ia'chinéajë' gubáz queë' Cristo.

## 2

### *Dios Bö' Lá'ayi ridisóalenë' légaquië'*

<sup>1</sup> Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo. <sup>2</sup> Tsárido'os biyön bö le birúaj lúzxiba, le biyön ca riyön cate' recja bö' budunu', ate' biyön idútë lu yu'u ga na' rő'ögaquië'. <sup>3</sup> Bulu'lu'í lahui yugu' bululu guí'do' lu bö'ös lógaquië', ate' gula'guísi que queëgaquië'. Bidisóalengaca tu tuë'. <sup>4</sup> Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

<sup>5</sup> Nacu'ë zían bönni' judío yödzo Jerusalén dza na', nácaqaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzo idútë yödzölió ni. <sup>6</sup> Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo. <sup>7</sup> Gula'ná' badxë' yúgu'të', en bulu'bájinë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'? <sup>8</sup> ¿Nacxi caz naca riyóniru' tu'ë xtídza'ru' ca naca didza' ru'íru' tu turu'? <sup>9</sup> Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,  
en luyú Mesopotamia, en luyú Judea, en luyú  
Capadocia,

en luyú Ponto, en luyú Asia,

<sup>10</sup> en luyú Frigia, en luyú Panfilia, en luyú Egipto,  
en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nacagaquië' bönni' judío, en ia'bal-lë' nazí lu ná'agaquië' le ta'yéajlë'ë bönni' judío Dios. <sup>11</sup> Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ru'íru' que queëru', ate' ta'guíxjö'ë yugu' le zxön benë' Dios, le tun ga rubániru'.

<sup>12</sup> Caní guca, bulu'báninë yúgu'të', en gula'bö'ë böniga. Gulë luzá'agaquië' tuë' ia'tué', ta'nnë':

—¿Bizxi caz lë ni?

<sup>13</sup> Bulu'titjë' bal-lë', ta'nnë':

—¡Ta'zúdxinë'!

### *Libán benë' Pedro lógaca bönachi zían*

<sup>14</sup> Ní'irö Pedro guzuílenë' ia'chinéajë' gubáz na' nasöl-lë'ë Cristo, ate' gusí lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacuá'ali' yödzö Jerusalén! ¡Lë ni ral-la' inözili'! ¡Buli'zë nágali' le guía' libí'ili'! <sup>15</sup> Netu' ni biti' rizúdxitu' ca na' réquili' libí'ili', tu' ni zóaru' si' gala' xsila, ate'

cuntu nu rizudxi hora caní. <sup>16</sup> Lë ni naca le gunné  
Joel, bönni' bë'ë didza' uláz queë Dios, gunné':

<sup>17</sup> Caní rnnë' Dios: Lë ni le gaca dza tsöjsétëgaca.

Isól-la'a Bö' Lá'ayi quia', tsöjsóalenë' yúgu'të  
bönnachi.

Zxí'inili', bönni', en nigula, ilu'íbi' didza' uláz quia'  
neda'.

Yugu' bi'i ra'bán ila'lé'ebi' le ulu'a lahui,  
ate' yugu' bönni' gula ila'nenë' yëla.

<sup>18</sup> Cate' idxín dza ni' quísia' Bö' Lá'ayi quia',  
tsöjsóalenë' huen dxin quia', bönni', en nigula,  
ate' ilu'ë didza' uláz quia' neda'.

<sup>19</sup> Ulu'a lahui lúzxiba xitsá' le ilún ga ulu'bani  
bönnachi,

ate' yödzölió ulu'a lahui le ilaca bë',  
rön, en guí', en dzön ca böaj.

<sup>20</sup> Ichul-la gubidza, ate' gaca beo' xiná ca naca rön.  
Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

<sup>21</sup> Ulu'lágaca yúgu'të nupa ni' ulu'lidza Lë' Xanru',  
lu yöl-la' réajlë' quéguequi Lë'.

<sup>22</sup> Buli'zë nágali' lë ni guía' libí'ili', bönnachi Israel.  
Dios caz benë' bal Jesús, bönni' Nazaret ga zóali'.  
Dios bë'ë Lë' lataj benë' le tun ga rubániru', yugu'  
yöl-la' huáca, en le taca bë'. Yúgu'të lë na' benë'  
Dios lu në'ë Jesús, ca na' chinöz quézili'. <sup>23</sup> Lësca'  
caní, Dios bë'ë lataj nu budödi Jesús lu ná'ali'. Caní  
guca, ca na' chigunná ládxë'ë Dios gunë', en ca  
naca le chibucözë' dza ni'te. Libí'i cázali' guzxönlí'-  
në' Jesús, en bëtili'-në' lu ná'agaquië' yugu' bönni'  
tuá' dö', bönni' gulútië' Lë' cate' ni' bulu'dá'gaquië'  
Lë' lë'e yaga cruz. <sup>24</sup> Ní'irö Dios caz busubanë'  
Jesús na'. Bubéajë' Lë' lu yöl-la' guti, tu' cabí guca

ugá'anë' tsaz lu yöl-la' guti na'. <sup>25</sup> Ca naca lë ni, bë'ë didza' David uláz queë' Dios ca naca queë' Jesús, gunné':

Bilé'etiqui'sida'-në' Xanru', zoë' lahua'.

Lë' zoë' cuita lë'a ibëla, rizönë' neda', para cabí gaca nu bi gun quia'.

<sup>26</sup> Que lë ni na' budzeja ládxa'a, ate' lu yöl-la' rudzeja quia' bil-la'.

Que lë ni na' guna' löza Lë' cate' idxín dza gátia'.

<sup>27</sup> Xantu' Dios, nözda' biti' ucá'anu' neda' lataj chul-la ga nacuá' nupa nátigaca.

Biti' gu'u lataj initi idútë le naca'.

Naca' bönni' nadxí'i quézinu' Li'.

<sup>28</sup> Buzéajni'inu' neda' ca ral-la' guna' para idéli'da' yöl-la' na'bán idú.

Gunu' ga udzëjada' tu' zóalen cazu' neda'.

<sup>29</sup> 'Na'a, libí'ili', böcha'a. Naca bë' gútië' xuz xtó'oru' David, en bigáchë'ë yeru ba, ate' ba queë' na' dë ga zóaru' ga ridxintë na'a dza. <sup>30</sup> David na' bë'ë didza' uláz queë' Dios, en gunözinë' benë' tsutsu Dios didza' le guzxí' lu në'ë queë', gunë' ga galjë' Cristo ladaj di'a dza queë' si' zá'gaca, ate' Cristo na' inná bë'ë xilatjë' David na'. <sup>31</sup> Tu' bilé'enë' David lë ni zí'alö, bë'ë didza' ca guca, bubanë' Cristo, en ca guca, biti' bugá'anë' lataj chul-la ga nacuá' nupa nátigaca, en biti' guniti le naca cazë'. <sup>32</sup> Dios busubanë' Jesús lu yöl-la' guti, ate' ca guca lë ni yúgu'tëtu' runtu' ba nalí que. <sup>33</sup> Caní guca, len yöl-la' huáca queë', Dios buchisë' Lë' xitsá' ga ni nácatërë' zxön. Na'a, Cristo chigusöl-lë'ë Dios Bö' Lá'ayi ni, ate' raca ca na' guzxí' lu në'ë Dios gunë' lu në'ë Cristo, ate' Dios

Bö' Lá'ayi na' runë' yugu' lë ni rilé'eli', en riyönili'.  
 34 Biti' buëpë' David na' yehua' yubá, pero lë cazë'  
 David na' gunnë':

Xanru' Dios gudxë' Xana':

Gurö'i cuita lë'a ibëla ga naca lo

35 cate' gunra' ga ulu'zechu zxíbigaca nupa  
 ta'dá'baga' Li' lo' Li'.

36 'Na'a, bönachi Israel, ral-la' inözili' le nácatë.  
 Dios benë' ga náquië' Lë cazë' Jesús ni Xanru',  
 en Bönni' Rusölá, bönni' na' budá'ali'-në' lë'e yaga  
 cruz.

37 Cate' yugu' bönni' ni' bila'yönnë' lë ni, gula'bö'ë  
 böniga, ate' gulë' Pedro, en ia'zica'rë' bönni' gubáz  
 queë' Cristo, ta'nnë':

—Böchi'ru', ¿nacxi gúntsatu'?

38 Ní'irö Pedro gudxë' légaquië':

—Buli'bí'i ládxi'li', en guli'dila nisa tu tuli' lu Lë  
 Jesucristo para uniti lahuë' Dios dul-la' nabága'li',  
 ate' Dios Bö' Lá'ayi idisóalenë' libí'ili', Nu na'  
 isöl-lë'ë Dios. 39 Queëli' nequi le guzxí' lu në'ë  
 Dios, en quégaca zxí'inili', enca' quégaca yúgu'të  
 bönachi izá'a, yúgu'të bönni' ni' ulidzë' Xanru' Dios  
 légaquië'.

40 Yugu' didza' ni, en ia'bal-la zían didza' benë'  
 ba nalí Pedro, le guchízië' icja nágagaquië', gunnë':

—Guli'gún ga uláli', irúajli' ládjagaca bönachi tuá'  
 dö' nacuá' dza ni zóaru' na'a.

41 Caní guca, gula'dila nisa nupa ni' gula'zí'  
 lu në'eguequi didza' na' bë'ë Pedro. Dza na'  
 ca chi uruá' gayuá' bönachi gulún légaquië' tuz.

42 Gulunë' yúgu'të' idútë le bulu'sédinë' gubáz  
 nasöl-lë'ë Cristo légaquië'. Guláquië' tuz tuë' len



ia'túë', en gulahuë' tsözxön le rusá' ládxi'ru' ca gútië' Jesús, ate' gulunë' tsözxön, bulu'lidzë' Dios.

### *Ca tun bönachi queë' Cristo*

<sup>43</sup> Gulunë' gubáz queë' Cristo zián le run ga rubániru', en zián le taca bë', pero guladxi gula'dzöbi ia'zíca'rö bönachi. <sup>44</sup> Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi. <sup>45</sup> Cate' bila'lé'enë' ta'yadzaj nupa nútsa'gaca ladjagaquië', ní'irö yugu' bönni' bi dë quégaquië' gulúti'ë le, ate' gula'guísië' dumí na' que queégaca nupa ni' bi ta'yadzaj. <sup>46</sup> Bulu'dübë' tsözxön chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxön, ate' bulu'dzéjanë', en gulaca idú ládxi'gaquië'. <sup>47</sup> Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

## 3

### *Ruhuóaqië' tu bönni' biti' raca së'ë*

<sup>1</sup> Tu dza ni' gula'benë' Pedro, en Juan, söjáquië' tsözxön lu chila yudo', cate' tu'dubi bönachi tu'lidza Dios ni', le naca idú ridödi xihuó. <sup>2</sup> Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí'i le Ra' Yu'u Lachi, para inábinë' nu bi unödztasö queë' ladaj nupa ni' ta'yaza lö'a yudo'. <sup>3</sup> Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yuë' lógaquië' bi ulu'nödztasë' queë'. <sup>4</sup> Ní'irö bulu'yúë' Pedro, en Juan lë', ate' Pedro gudxë' lë':

—Buyú netu’.

<sup>5</sup> Ní’irö bönni’ na’ buzëda’ náguië’ légaquië’ tu’ runë’ löza bi ulu’nödztasë’ queë’. <sup>6</sup> Pedro gudxë’ lë’:

—Biti’ dë dumí plata, dumí oro quia’, pero le dësö quia’ gunna’ quiú’. Ni’a que yöl-la’ huáca que Lë’ Jesucristo, bönni’ Nazaret, guyasa, en guzë’e.

<sup>7</sup> Ní’irö gudélë’ë Pedro në’ë ibëla bönni’ huë’ na’, en buchisë’ lë’, ate’ la’ böácatë ni’ë, en buguitaj bëchaj ni’ë bönni’ na’. <sup>8</sup> Ní’irö guzuínë’ bönni’ na’, ate’ guxítí’ë, en guzë’ë. Guyázalenë’ tsözxön Pedro, en Juan, lö’a yudo’, rizë’e ni’ë, en rixítí’ë, en rigú’ë Dios yöl-la’ ba. <sup>9</sup> Yúgu’të bönachi nacua’ ni’ ta’lé’e lë’ rizë’e ni’ë, en rigú’ë Dios yöl-la’ ba. <sup>10</sup> Caní guca, guládxinë’, en bulu’báninë ca naca lë na’ guca, tu’ bulu’únbë’ë lë’, náquië’ bönni’ na’ ribö’ë ra’ yudo’ ga nazí’i le Ra’ Yu’u Lachi, rinabë’ nu bi unödztasö queë’.

### *Didza’ bë’ë Pedro chila yudo’*

<sup>11</sup> Tsanni ni’ bönni’ na’ biti’ guca së’ë, ate’ böáquië’, zönë’ ná’agaquië’ Pedro, en Juan, bulu’dubi yúgu’të bönachi ga na’ nacú’ë chila yudo’ nazí’i le: Chila Queë’ Salomón, ate’ gula’ná’ badxë’.

<sup>12</sup> Cate’ bilé’enë’ Pedro lë ni, gudxë’ bönachi na’:

—Libí’ili’, bönni’ Israel, ¿bizx que rubánili’ ca naca lë ni? ¿Bizx que ruyuli’ netu’, en réquitseli’ nétu’sö buntu’-në’ bönni’ ni, en bentu’ ga rizë’e ni’ë len yöl-la’ huáca queëztu’, o ni’a que le reaj ládxi’tu’-në’ Dios? <sup>13</sup> Naca lë ni le benë’ Dios. Náquië’ Dios quégaquië’ xuz gudödi queëru’ Abraham, en Isaac, en Jacob. Lë cazë’ béntëre’ bal Jesús, Zxí’inë’. Jesús ni, libí’i cázali’ bëtili’-në’ lu ná’agaquië’ bönni’ ta’nná bé’enë’ libí’ili’. Cate’ gú’unnë’ Pilato usanë’

Jesús, gudá'baga'li'-në'. <sup>14</sup> Buzóali' tsölá'alö Bönni' Tshui', en Lá'ayi, ate' gunábili'-në' Pilato usanë' queéli' tu bönni' rútië' bönachi. <sup>15</sup> Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. <sup>16</sup> Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

<sup>17</sup> 'Na'a, böcha'a, nözda' benli' caní, bëtili'-në' Jesús tu' cabí guyéajni'ili', en bití' gula'yéajni'inë' bönni' ta'nná bé'enë' libí'ili'. <sup>18</sup> Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'i sáquë'ë Cristo. <sup>19</sup> Que lë ni na', buli'bí'i ládxi'li', en buli'huóáca queë' Dios, para ugüë' dul-la' nabága'li', en gunë' ga huóáca ládxi'li'. <sup>20</sup> Ní'irö isöl-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. <sup>21</sup> Na'a, run bayudxi ugá'anë' yehua' yubá ni' cate' idxinrö dza uduhuënë' tshui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. <sup>22</sup> Lësca' caní Moisés gudxë' xuz xtó'oru', gunné': "Xanru' Dios isöl-lë'ë queéli' tu bönni' galjë' ladjagaca di'a dza queéli'. Gáquië' bönni' gu'ë didza' uláz queë' Dios. Isöl-lë'ë Lë' queéli' ca na' gusöl-lë'ë neda'. Run bayudxi uzë' nágali'-në' ca naca yúgu'të le guíë' libí'ili'. <sup>23</sup> Yúgu'të nupa bití' ulu'zé nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

<sup>24</sup> 'Ca naca dza ni zóaru' na'a, gula'guíxjö'ë

yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. <sup>25</sup> Libí'ili' nácali' xzí'ini xi'sóagaquië' bönni' gulu'ë didza' uláz queë' Dios, ate' nequi queéli' didza' rucá'ana tsahui', le bénlenë' Dios xuz xtó'oru', cate' ni' gudxë' Abraham: "Ni'a que le gunë' xzí'ini xi'sú' ilaca bica' ba yúgu'të bönachi yödzölió." <sup>26</sup> Cate' Dios busubanë' Xzí'inë' lu yöl-la' guti, gusöl-lë'ë Lë' zí'alö queéli' para gunë' ga gácali' bica' ba, en ucá'anali' le cabí naca dxi'a runli'.

## 4

*Ta'dxinë' Pedro, en Juan lógaquië' bönni' yudo' tu'chi'a tu'söröë'*

<sup>1</sup> Tsanni ni' bönachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsárido'os ga na' nacu'ë. <sup>2</sup> Gula'lenë' bönni' ni tu' tu'sédinë' Pedro, en Juan, bönachi, en tē' léguequi ulu'bán nupa chinátigaca tu' bubanë' Jesús. <sup>3</sup> Ní'irö gula'zönë' Pedro, en Juan, ate' gula'gu'ë légaquië' lidxi guié ga idxinrö dza yúbölö tu' chiridzö' dza na'. <sup>4</sup> Zían nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo ná'cagaquië' idú chi-un gáyu'ë.

<sup>5</sup> Dza buropi ni', yugu' bönni' unná bë', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzö Jerusalén. <sup>6</sup> Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'. <sup>7</sup> Ní'irö duchë'gaquië' Pedro, en

Juan, ate' bulu'sudxinë' légaquië' gatsaj láhui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

<sup>8</sup> Ní'irö Pedro gudxë' légaquië', zóalenë' Dios Bö' Lá'ayi lë', rnnë':

—Libí'ili', núlöli' rinná bé'eli' netu', bönachi Israel, en libí'ili', bönni' gula. <sup>9</sup> Na'a, ¿rinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni? <sup>10</sup> Riguíxjöi'itu' libí'ili' para ila'nözi yúgu'të bönachi Israel. Zoë' bönni' ni loli', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni budá'ali'-në' lë'e yaga cruz, pero Dios busubanë' Lë' lu yöl-la' guti. <sup>11</sup> Dios bë'ë' didza' ca naca queë' Jesús ni, cate' ni' gunnë': "Libí'ili', bönni' rucuá'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö." <sup>12</sup> Cúnturö nu zoa nu gaca usölá bönachi, tu' cabí zoa yödzölió ni ia'túë' bönni' nuzöë' Dios, nu gaca usölá rë'u.

<sup>13</sup> Cate' bila'lé'enë' nácagaquië' rugu ladxi' Pedro, en Juan, en guléquibe'enë' biti' nazédagaquië' que yudo', en nácagaquië' bönni' cá'asö, bulu'bábinë', ate' yöjnéguequinë' Pedro, en Juan na', gula'cuá'lenë' Jesús. <sup>14</sup> Lësca' bila'lé'enë' bönni' na' böáquië', zuinë' lógaquië', ate' biti' guca bi ila'nnë' quégaquië'. <sup>15</sup> Ní'irö gula'nná bé'enë' nupa ulu'béaj légaquië' ló'alö yu'u ga na' nudúbigaquië', ate' gulún xtidzë'ë la' légacasë'. <sup>16</sup> Gula'nnë':

—¿Nacxi gúntsaru' quégaquië' bönni' ni? Le nácatë gulunë' tu le run ga tu'bani bönachi, ate' nözigaca yúgu'të bönachi nacuá' Jerusalén lë ni. Biti' gaca

tá'baga'ru' le. <sup>17</sup> Na'a, para cabí sërö didza', en ila'yöni ziánrö ca' bönachi, uzeru' bach légaquië' para cabí ilu'ilenrë' bönachi didza' ca naca queë' Jesús na'.

<sup>18</sup> Ní'irö bulu'lidzë' Pedro, en Juan, ate' bulu'zenë' bach légaquië' para cabí ilu'ilenrë' bönachi didza', en para cabí ulu'sédinë' légaquië' ca naca queë' Jesús. <sup>19</sup> Ní'irö bulu'bi'ë didza' Pedro, en Juan. Gulé' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídza'li' libí'ili' ca xtídzë'ë Dios. <sup>20</sup> ¡Biti' gaca soa dxitu'! ¡Run bayudxi güi'itu' didza' que le bilé'etu', en le biyönitu'!

<sup>21</sup> Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzo ni', tu' ta'gú'u Dios yöl-la' ba ni'a que lë na' guca. <sup>22</sup> Bönni' na' böáquië', en guca queë' lë na' run ga rubániru', chiyú'urë' ca choá' iz.

*Ta'nábinë' Dios gunë' ga ilácagaquië' rugu ladxi'*

<sup>23</sup> Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bönni' gula tu'zéajni'inë' bönachi judío. <sup>24</sup> Cate' bila'yönnë' lë ni, bulu'lidzë' Dios tsözxön, gula'nnë':

—Xantu' Dios, ¡zxöntërö nacu' Li'! ¡Li' nacu' Dios! ¡Benu' lúzxiba! ¡Benu' luyú! ¡Benu' nísado! ¡Benu' yúgu'të le nacua' tu tu lataj na'! <sup>25</sup> Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunné':

¿Bizx que tun dzatsa bönachi,  
en ta'zá' ládxi'gaca le ruá' dö'?

<sup>26</sup> Yugu' bönni' ta'nná' bē'ë yödzülió ni gulún  
dzatsē',

ate' guláquiē' tuz bönni' unná' bē'.

Gula'dá'báguē'ë Xanru' Dios,

enca' Cristo, bönni' gurö' cazē' Lē'.

<sup>27</sup> 'Le nácatē' guláquiē' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzü ni. Gula'dá'báguē'ë Jesús, Zxí'inu' lá'ayi, Bönni' na' buzú' queētu'. <sup>28</sup> Gulunē' yúgu'tē' le bucözu' zí'atēlö, en guzxí' lu no'o, ate' guca ca na' benu' tsutsu xtídzu'u ca ral-la' gaca. <sup>29</sup> Na'a, Xantu', buyú' le tu'zenē' bach netu', en ben ga gácatu' rugu ladxi', para güí'itu' xtídzu'u, netu' bönni' huen dxin quiu'. <sup>30</sup> Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bē'. Gaca caní tu' zóalenē' Jesús, Zxí'inu' lá'ayi, netu'. ¡Ca' gaca!

<sup>31</sup> Cate' budxi bulu'lidzē' Dios, guzxizi lataj ga na' nacu'ë, ate' Dios Bö' Lá'ayi guzóalenē' yúgu'tē', ate' len yöl-la' rugu ladxi' quégaquiē' gulu'ë xtídzē'ë Dios.

*Tu'únē' tuz le dē' quégaquiē'*

<sup>32</sup> Bönachi zían na' ta'yéajlē' Cristo, tuz ca ta'zá' ládxi'guequi, en tuz ca gulúngaca. Biti' gunnē' nu bönni' nútsē'ë ládjagaquiē' nequi queézē' le dē' queē', pero bulu'únē' tuz le dē' quégaquiē'.

<sup>33</sup> Len yöl-la' huáca zxön gula'guíxjö'ë gubáz na' nasöl-lē'ë Xanru' Jesús ca bubanē' Lē', ate' le buzá' ládxi'ë Dios quégaquiē' gúcalen yúgu'tē'.

<sup>34</sup> Cuntu nu bi biyadzaj nu nutsa' ládjagaquiē'.

Caní guca tu' yúgu'tè bönni' zoa bi dè quégaquië', xiyúgaquië', o lídxigaquië', gulúti'è le, ate' dumí que na' yöjuá'gaquië', <sup>35</sup> en bulu'dödë' le lu ná'agaquië' gubáz na' nasól-lë'è Cristo, ate' légaquië' gula'guisië' le que queégaca nupa bi biyadzaj quéguequi. <sup>36</sup> Zoë' José ni', bönni' bulu'zöë' gubáz na' nasól-lë'è Cristo ia'tú lë' Bernabé, le rna lu didza' xidza', Bönni' Ruhué Tsáhuë'è. Nabábalenë' zxi'ini xi'sóë' Leví, en guljé' luyú Chipre. <sup>37</sup> Bëti'è bönni' ni tu cö' xiyúë', ate' yöju'è dumí que na', en budödë' le lu ná'agaquië' gubáz na' nasól-lë'è Cristo.

## 5

### *Dul-la' gulunë' Ananías, en Safira*

<sup>1</sup> Tu bönni' yúbölö lë' Ananías, bëti'è tu cö' xiyúë'. Safira, nigula queë', bennu tsözxön lë'. <sup>2</sup> Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'è le lu ná'agaquië' gubáz nasól-lë'è Cristo. Rnnë':

—Tsa nisö guzxi'a.

<sup>3</sup> Pedro gudxë' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'? <sup>4</sup> Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que gurö'ö icju' gunu' caní? Dios caz guzxi' yé'enu', calégasö bö'nachi.

<sup>5-6</sup> Cate' biyönnë' Ananías didza' ni, gudzö'è, en gútité'. Ní'irö gula'bíga'tëbi' bi'i ra'bán, ate' bulu'chölibi' lë' lari', en gulu'á'abi' lë', en



yöjčáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

<sup>7</sup> Ca tsonna hora gudödi ni', bidxinnu nigula queë' Ananías na' ni', en biti' nözinu lë na' guca queë' bönni' queënu. <sup>8</sup> Ní'irö Pedro gudxë'-nu:

—Gudíxjöi'i neda'. ¿Naru' guzxí'ili' tsca nisö xiyuli' na'?

Gunnánu:

—Ön, tsca nisö guzxí'itu'.

<sup>9</sup> Ní'irö Pedro gudxë'-nu:

—¿Bizx que ben tuz xtídza'li' guzxí' bë' xíhui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

<sup>10</sup> Ní'irö la' gudzö'tënu xini'ë Pedro, en gútitënu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjčáchi'gacabi'-nu cuita lë'ë bönni' queënu.

<sup>11</sup> Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

*Tunë' bönni' gubáz nasöl-lë'ë Cristo le taca bë'*

<sup>12</sup> Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxön lógaca bönachi lu yödzö. Yúgu'të' bulu'dübë' tsözxön ga naca chila yudo' nazí'i le Chila Queë' Salomón.

<sup>13</sup> Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzö ni' gulún légaquië' bal. <sup>14</sup> Ní'irö ia'bal-la bönachi zían ca' gula'yéajlë' Cristo, bönni', en nigula. <sup>15</sup> Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza,

ate' gula'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huöáca. <sup>16</sup> Lësa' bila'rúaj bönachi yugu' dzaga yödzö, en bila'dxín Jerusalén, nu'ágaca nupa te'e, en nupa ta'gu'i ta'zaca' tu' yú'ugaca bö' xihui' léguequi, ate' bulu'huöáca yúgu'tëguequi.

*Bönni' yudo' ta'bia lãdxi'gaquië' bönni' gubáz nasöl-lë'ë Cristo*

<sup>17</sup> Que lë ni na' bixúz lo, en bönni' yudo' sãduceo na' dá'gaquië' bixúz lo, bulu'zxé'enë' Pedro. <sup>18</sup> Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guié. <sup>19</sup> Ní'irö bidxinë' gubáz lá'ayi queë' Xanru' chi'i dzö'ölö, ate' gusaljë' lidxi guié na', en bubéajë' légaquië'. <sup>20</sup> Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjë'len bönachi ni' didza', quí'xjöi'ili' légaquië' ca naca yöl-la' na'bán idú ni, en ca gaca ila'déli'në' le.

<sup>21</sup> Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'isö bulu'dübë' bixúz lo, en nupa nacué'len lë' tsözxön, len bönni' yudo' tu'chí'a tu'söröë', en bönni' gula tu'zëajni'inë' bönachi Israel, ate' gula'söl-lë'ë nupa tsöjaca lidxi guié para tsöjxi'gaquië' yugu' gubáz na' nasöl-lë'ë Cristo, tu' téquinë' ni' nacué' lidxi guié na'. <sup>22</sup> Cate' ni'a ná'agaquië' bönni' yudo' na' bila'dxinë' ni', bití' yöjxáca'gaquië' légaquië' lu yu'u lidxi guié na', ate'

ní'irö bulu'huöajë' tsöjtíxjö'gaquië' ca'. <sup>23</sup> Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guië, ate' nacuá' nupa tun chi'i ra' lidxi guië na', pero cate' gusalajtu', cuntu nu yöjxáca'tu' lu yu'u na'.

<sup>24</sup> Cate' bixúz lo, en yugu' bixúz unná bë', en bönni' nacuá' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabí nöziguequinë' bizxi guntë lë na' raca. <sup>25</sup> Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guië nacu'ë chila yudo' tu'sédinë' bönachi.

<sup>26</sup> Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'ché'ë yugu' gubáz na' nasöl-lë'ë Cristo, pero bití' bi gulunë' quégaquië', tu' guládxinë' ulu'ládxí' bönachi nacuá' ni' légaquië' guiöj. <sup>27</sup> Cate' chinachë'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

<sup>28</sup> —¿Naru' cabí gúdxida'atu' libí'ili' bití' usédili' bönachi ca naca queë' bönni' na'? Na'a, chigudísili' xibá ni idútë yödzö Jerusalén, en rë'ënili' usubága'li' netu' xíguia' tu' nözi yöl-la' guti queë' bönni' na'.

<sup>29</sup> Ní'irö bulu'bi'ë didza' Pedro, en ia'zícá'rë' gubáz na' nasöl-lë'ë Cristo, ta'nnë':

—Run bayudxi uzërö ná'gatu' xtídzë'ë Dios ca xtídza'gaca bönachi. <sup>30</sup> Libí'ili' bëtili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'. <sup>31</sup> Jesús

ni, Dios buzóa cazë Lë' ga nayëpisëtëre' cuita lë'ë ibëla, para gáquië' Bönni' Lo, en Bönni' Rusölá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'. <sup>32</sup> Ca naca lë ni, runtu' netu' ba nalí que, ate' lësca' runë' Dios Bö' Lá'ayi ba nalí que, Bö' na' risöl-lë'ë Dios quégaca nupa tun ca rnna xtídzë'ë.

<sup>33</sup> Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'. <sup>34</sup> Ní'irö guzuinë' tu bönni' yudo' ruchi'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasöl-lë'ë Cristo ló'alö tu chí'ido'. <sup>35</sup> Ní'irö gudxë' bönni' yudo' tu'chi'a tu'söröë' na', gunné':

—Libi'ili', bönni' Israel, buli'yutëz queëli' ca naca le rë'ënilí' gunlí' quégaquië' bönni' ni. <sup>36</sup> Ral-la' tsöjnéli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayëpisëtëre'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni' yöjtá'gaca lë', ate' gunítisö ca' yúgu'të le benë' bönni' na'. <sup>37</sup> Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guízxaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni' yöjtá'gaca lë'. <sup>38</sup> Que lë ni na' rea' libí'ili': Gulí'sán-gaquië' bönni' ni, en bití' bi gunlí' quégaquië'. Channö naca quégacasö bönachi lë ni ta'nnë' o lë ni tunë', iníti caz, <sup>39</sup> pero channö

naca queë' Dios, biti' gaca usunítili' le. ¡Buli'yú cuinli' cabí tíl-lalenli'-në' Dios!

<sup>40</sup> Ní'irö gulunë' tuz didza' len lë'. Bulu'lidzë' yugu' gubáz na' nasöl-lë'ë Cristo, ate' gula'guinë' légaquië', en bulu'zenë' légaquië' bach para cabirö iluí'ilenë' bönachi didza' ca naca queë' Jesús. Ní'irö bulu'sanë' légaquië'. <sup>41</sup> Bila'rúajë' gubáz na' nasöl-lë'ë Cristo lógaquië' bönni' yudo' tu'chi'a tu'söröë' na'. Tu'dzéjanë' tu'bë'ë Dios légaquië' lataj gula'guí'i gula'záquë'ë tu'dá'gaquië' Jesús. <sup>42</sup> Yugu'dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

## 6

*Ta'böë' gadxi bönni' para ilácalenë' bönachi queë' Cristo*

<sup>1</sup> Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntu nu ruí'i le ilágunu nigula uzëbi quégaquië' bönni' ni' tu'ë didza' griego. <sup>2</sup> Ní'irö idxínnutë' bönni' gubáz na' nasöl-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi. <sup>3</sup> Que lé ni na', böchi' luzá'atu', guli'cö gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bö'

Lá'ayi zóalenë' légaquië'. <sup>4</sup>Netu' ni ulídzatica'stu'-në' Dios, en uséditu' bönachi xtídzë'ë Dios.

<sup>5</sup>Yúgu'të' gula'yaza ládxi'gaquië' didza' ni, ate' gula'böë' Esteban, tu bönni' réajlë'ë Cristo idú ládxë'ë, en zóalenë' Dios Bö' Lá'ayi lë'. Lësca' gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquia, bönni' zí'alö butsé'ë ca runë' para tseaj ládxë'ë Dios ca tunë' yugu' bönni' judío. <sup>6</sup>Ní'irö bulu'sudxinë' bönni' na' gula'böë' lógaquië' gubáz na' nasöl-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

<sup>7</sup>Guzërö xtídzë'ë Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

### *Ta'zönë' Esteban*

<sup>8</sup>Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buzá ládxë'ë queë'.

<sup>9</sup>Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sedë' queë' Dios, nazí'i le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandro, en luyú Cilicia, en luyú Asia, gulunë' légaquië' tsözxön. Bönni' ni gula'díl-lalenë' Esteban didza'.

<sup>10</sup>Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. <sup>11</sup>Ní'irö gula'guíxjë' bönni' ila'zí' yë'ë, ila'nnë': "Netu' biyönitu' didza' ru'ë Esteban ni, rnnë' zí'ë queë' Moisés, en queë' Dios."

<sup>12</sup>Caní guca, bönni' ni gula'gu'ë xilá ládxi'gaca bönachi, tsözxön len bönni' gula tu'zéajni'inë', en

yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'ché'ë lë' lógaquië' bönni' yudo' tu'chi'a tu'söröë'. <sup>13</sup> Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë zi'ë que yudo' lá'ayi ni, en que xibá queë' Dios. <sup>14</sup> Biyönitu' didza' bë'ë bönni' ni ca gunë' Jesús, bönni' Nazaret, rnnë' usunítie' yudo' ni, en utsé'ë yugu' le nalébiru' runru', yugu' lë na' gunná bé'enë' Moisés rë'u.

<sup>15</sup> Ní'irö bönni' yudo' tu'chi'a tu'söröë', en yúgu'të nupa rő'gaca ni' bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

## 7

### *Didza' bë'ë Esteban, le gunnë' uláz queë'*

<sup>1</sup> Ní'irö bixúz lo gunábinë' Esteban na', rnnë':

—¿Naru' nácatë caní?

<sup>2</sup> Bubi'ë didza' Esteban, rnnë':

—Libi'ili', bönni' gula, en libi'ili', böcha'a. Buli'zë nágali' le guía' libi'ili'. Dios, Bönni' nayëpisëtërë', buluí'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsóë' yödzö Harán. <sup>3</sup> Dios gudxë' lë': “Birúaj ladzu', en bulá'alén di'a dza quiu', ate' guyéaj luyú ni' uluí'ida' li'.” <sup>4</sup> Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsóë' yödzö Harán. Lu yödzö ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni zóaru' na'a. <sup>5</sup> Dios biti' bë'ë lë' lataj guequi queë' luyú ni. Calëga láti'sö bunödzjë' queë' ga soë' luyú ni, pero guzxí lu

në'ë Dios unödzejë' queë' luyú ni, ate' tódi gátie' Abraham guequi luyú ni quegaca xzí'ini xi'sóë', sal-la' bití' nacu'ínibi' bi'i queë'. <sup>6</sup> Lësca' caní Dios gudxë' Abraham: "Tsójáquië' xzí'ini xi'sú' lu xiyúgaca bönachi izá'a, ate' ni' ilácagaquië' ca bönachi zi'tu'. Ilunë' bönni' luyú ni' ga ilácagaquië' xzí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz." <sup>7</sup> Lësca' Dios gudxë' lë': "Neda' uzötja' bönachi luyú ni', ga ni' ilácagaquië' xzí'ini xi'sú' bönni' nadó'ogaquië', ate' tódi ni' ulu'rúajë' ni', ate' ilunë' xichina' luyú ni." <sup>8</sup> Dios bënlenë' Abraham tu didza' rucá'ana tsahui', en gunná bé'enë' lë' ichúguië' lu xipéla'gaquië' bönni' biguiú' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipéla'bi' lë' na' naca bë'. Isaac na', lësca' caní benë' queëbi' bi'i Jacob, xzí'inë', en caní benë' ca' Jacob quegaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

<sup>9</sup> 'Yugu' xuz xtó'oru' na', lu yöl-la' ruzxé'e quegaquië', gulúti'ë-bi' bi'i José, bóchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na' <sup>10</sup> en busölë'-bi' lu le gulaca queëbi'. Dios bë'ë-bi' yöl-la' réajni'i, le ben ga guyaza ladxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacuá' lidxë' Faraón na'.

<sup>11</sup> 'Ní'rö gúcada' gubín idú luyú Egipto, en luyú Canaán ni, ate' gula'guí'i gula'zaca' yúgu'të bönachi



dza ni'. Biti' bidzöli le ilahuë' xuz xtó'oru'. <sup>12</sup> Cate' biyönnë' Jacob dë zxa' xtila luyú Egipto, gusöl-lë'ë yugu' xzí'inë', bönni' ni' nácagaquië' xuz xtó'oru', luyú ni'. Caní guca le zí'aló luzuí yöjáquië' ni'. <sup>13</sup> Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José. <sup>14</sup> Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi. <sup>15</sup> Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que quéëgaquië'. <sup>16</sup> Cate' gulátië' tu tu xuz xtó'oru', xzí'ini xi'sóagaquië' yöjuá'agaquië' légaquië' luyú Siquem, ate' ni' bulu'cáché'ë légaquië' yeru ba lu zxan bulóaj na' gú'uë' Abraham lu ná'agaca xzí'inë' Hemor, bönni' Siquem na'.

<sup>17</sup> 'Gudödi zían iz, cate' bidxín dza ral-la' gaca le guzxi' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. <sup>18</sup> Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. <sup>19</sup> Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sané'-bi' bi'i bönni' huë'ënido' que quéëgaquië', para ilátibi'. <sup>20</sup> La' dza ní'sö gúljabí ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. <sup>21</sup> Cate' bidxín dza ulu'sané'-bi' xuz xiná'abi' para gátibi' bí'ido' Moisés na', bidxinnu nigula xzí'inë' Faraón ga ni' bulu'cá'anë'-bi', ate'

yöjzxi'ínu-bi', en buscúlunu-bi' ca bi'i que cázanu.  
 22 Caní guca, bizédabi' bi'i Moisés yúgu'tè le táquië  
 bönni' Egipto, en gúcatëröbi' zxön ca naca didza'  
 bë'ëbi', en ca nácagaca le benbi'.

23 'Cate' Moisés na' chiyú'ubi' choá' iz, gunná  
 ládxi'bi' tsöjyubi' bönachi uládz queëbi', bönachi Is-  
 rael. 24 Cate' bidxinbi' ga na' nacu'ë, bilé'ebi'-  
 në' tu bönni' Egipto, rusaca' zi'ë tu bönni' uládz  
 queëbi'. Ní'irö gúcalenbi'-në' bönni' uládz queëbi'  
 na', en bëtibi'-në' bönni' Egipto na'. Caní guca,  
 buzí' labi' bi'i Moisés bönni' na' uláz queë' bönni'  
 uládz queëbi'. 25 Gúquibi' Moisés hualá'yéajni'inë'  
 bönni' böchi'bi' gunë' Dios ga usölábi' lë cázabi'  
 légaquië', pero légaquië' biti' gula'yéajni'inë'. 26 Ia'tú  
 dza ca' yöjxáca'bi' ia' chopë' bönni' Israel, ta'dil-  
 lë', ate' gú'unibi' cuéqui dxibi' légaquië', en gúdxibi'  
 légaquië': "Libí'ili', böchi'li' naca. ¿Bizx que ruá'ali'  
 luzá'ali' dö'?" 27 Ní'irö bönni' na' ru'ë dö' que luzë'ë  
 budxiguë'ë-bi' bi'i Moisés, gunné': "¿Núzxitë buzóa  
 li' para inná bé'enu' netu', en uchi'a usöröu' le  
 runtu'? 28 ¿Naru' rë'ënitsenu' gútiu' ca' neda' ca  
 benu' néaje, bëtiu'-në' bönni' Egipto na'?" 29 Cate'  
 Moisés biyönibi' didza' ni, buzúnajbi' ni', en  
 yöjsóabi' luyú Madián ga ni' guzóabi' ca tu bönni'  
 zi'tu'. Luyú Madián na' butsaga ná'alenbi'-nu  
 nigula lu yödzo ni', ate' gúljacacabi' chópabi' bi'i  
 bönni' queë'.

30 'Cate' chigudödi choá' iz zoë' ni', buluí'i lahuë'  
 tu gubáz lá'ayi queë' Dios ga zoë' lu guí' que yaga  
 yötsi'do' régui, ga ni' naca lu lataj cá'asö, le rö'ö  
 ra' guí'a nazí'i le Sinaí. 31 Cate' Moisés bilé'enë'  
 guí' na', bubáninë', ate' gubígui'ë gala' para ilé'enë'

dxí'a, ate' biyönnë' chi'ë Xanru'. <sup>32</sup> Caní gudxë' Xanru' lë': "Neda' naca' Dios quégaquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guxzíxidë'ë Moisés, en bíti'rö burúguinë' uyúë'. <sup>33</sup> Xanru' gudxë' lë': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni. <sup>34</sup> Le nácatë chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda' ta'bödxí yeche'. Bötja', zoa' ni para usölä' légaquië'. Gudá na'a, isöl-la'a li' luyú Egipto."

<sup>35</sup> 'Sal-la' bönni' uládz queë' Moisés, bulu'cá'anë' lë' cá'asö, gula'nnë': "¿Núzxitë buzóa li' para inná bé'enu' netu', en uchi'a usöröu' le runtu'?" Dios gusöl-lë'ë lë' para gáquië' bönni' unná bë', en bönni' rusölä, ca na' gubáz lá'ayi na' queë' Dios gudxë' Moisés, cate' buluí'i lahuë' lu yaga yötsi'do' régui ga na' zoë'. <sup>36</sup> Moisés ni bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö. <sup>37</sup> Lë cazë' Moisés na' gudxë' bönachi Israel ni', gunné': "Xanru' Dios isöl-lë'ë queëli' tu bönni' galjë' ladaj dí'a dza queëli', ate' gáquië' bönni' gu'ë didza' uláz queë' Dios. Isöl-lë'ë lë' queëli' ca na' gusöl-lë'ë neda'. Lë cazë' run bayudxi uzë nágali'-në'." <sup>38</sup> Lësca' lë cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bé'len lë' didza' lu guí'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruí'i didza' ca gaca ila'deli' bönachi yöl-

la' na'bán, ate' budödë' Moisés xibá ni lu ná'agaca  
zxí'ini xi'sóagaquië' ga ridxintë queëru' rë'u.

<sup>39</sup> 'Biti' gulë'ënnë' xuz xtó'oru' ilunë' ca rnna  
xtídzë'ë Moisés, pero bulu'zóë' lë' tsölá'alö, en  
gulë'ënnë' tsöjhuöjgaquië' luyú Egipto. <sup>40</sup> Cate' ni'  
zoë' Moisés na' lu guí'a Sinaí na', légaquië' gulë'  
Aarón, böchë'ë Moisés na', gula'nnë': "Ré'ënitü'  
gunu' yugu' dios queëtu', tu budó' guië, para  
tsöjnörugaca lotu'. Biti' nöztu' bi guca queë'  
Moisés, bönni' na' nubéajë' netu' luyú Egipto."

<sup>41</sup> Ní'irö gulunë' tu budó' oro le naca ca tu bëdxido',  
ate' gulútië'-ba' bö'cu' zxíla'do', en gulú'ugaquië'-  
ba' lo budó' oro na', ate' gulunë' laní lo budó'  
na' núngaquië'. <sup>42</sup> Que lë ni na' Dios bucá'anë'  
légaquië', en guléaj ládxe'ë légaquië'. Ní'irö gula'yéaj  
ládxi'gaquië' yugu' le ta'yëpi lúzxiba. Ca naca lë ni  
nazúaj lu guichi le gula'nnë' bönni' gulu'ë didza'  
uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bëdxi ni'  
bëtigacali'-ba', en buzégui'gacali'-ba',

lë na' benli' lu lataj cá'asö idú ca choá' iz?

<sup>43</sup> Biti' gulú'ugacali'-ba' quia' neda',

pero biá'ali' le nequi que Moloc, budó' guiöj  
queëli'.

Biá'ali' ca' tu le naca ca bölj lúzxiba nazí'i le Refán,  
lë na' buzóali' ca dios queëli'.

Yugu' budó' guiöj budó' yaga ni,

la' libí'isili' benli' para guyéaj ládxi'li' léguequi.

Que lë ni na', ubéaja' libí'ili' lu xiyuli',

en ichë'a libí'ili' zí'tu'rö ga dë luyú Babilonia.

44 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le buluí'inë' Dios lë' lu guí'a ni'. 45 Lësca' bulu'dödë' yu'u lari' na' lu ná'agaquië' zxí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'güë' xiyúgaca bönachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David. 46 Dios guyaza ládxe'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. 47 Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios. 48 Caní benë' sal-la' biti' zoë' Dios, Nu nácatërö lo, tu lu yudo' núngaca bönachi. Ca naca lë ni' gunné' tu bönni' bë'ë didza' uláz queë' Dios, gunné':

49 Yehua' yubá naca ga rö'a rinná bë'a, ate' yödzölió naca xilibi ni'a.

Rnnë' Xanru': "¿Naru' gúntsali' tu yu'u ga soa'?"

¿Naru' zóatsö tu lataj ga ral-la' uzí ládxa'a?"

50 ¿Naru' cabí len na'a caza' bena' yúgu'të lë ni'?"

51 Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágali'. Nazidi icja ládxi'do'oli' ca raza quégaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'. 52 Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios.

Lësca' gulútië' bönni' ni' gula'guíxjö'ë zí'alö ca ralla' guidë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bétili'-në' lu ná'agaquië' bönni' gulútië' Lë'. <sup>53</sup> Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero bití' runli' ca rna.

### *Tútië' Esteban*

<sup>54</sup> Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë. <sup>55</sup> Ní'irö buyüë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayëpisëtërë'. <sup>56</sup> Ní'irö gunné':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

<sup>57</sup> Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bödxí'ë zidzaj, en tsözxön gula'bía dí'ë Esteban na'. <sup>58</sup> Bulu'béajë' lë' ní'ilö ra' yödzö na', ga ni' bulu'ladxë' lë' guiöj. Yugu' bönni' ni' tunë' ba nalí le tu'zéguië' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj. <sup>59</sup> Cate' ni' tu'ladxë' Esteban guiöj, lë' bulidzë' Dios, gunné':

—Xána' Jesús. Buzí' bö' naca caza'.

<sup>60</sup> Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!  
Cate' budxi bë'ë didza' ni, gútité'.

## 8

*Saulo ribía ládxë'ë bönachi queë' Cristo*

<sup>1-3</sup> Saulo benë' tsözxön yugu' bönni' ni' gulútië' Esteban.

La' ní'sö yugu' bönni' ta'yéaj ládxi'gaquië' Dios gulu'agaquië' Esteban, ate' yöjčáchi'gaquië' lë'. Gula'bödxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxía ládxë'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guié.

Ní'irö gulásilasi ia'látisö cabí bidáčigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasöl-lë'ë Cristo bulu'gá'anë' Jerusalén.

*Raca libán que didza' dxi'a luyú Samaria*

<sup>4</sup> Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a. <sup>5</sup> Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo. <sup>6</sup> Bulu'dubë' yugu' bönni' ni', ate' idú ládxi'gaquië' bulu'zë nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. <sup>7</sup> Caní guca, tu' benë' ga bulu'rúaj zían bö' xihui' yú'ugaca bönachi, ta'bödxí'a zidzaj, ate' bulu'huóaca zían nupa te'e huë' nacú'uni bin, en nupa bití' guca sá'gaca. <sup>8</sup> Caní guca, bulu'dzeja bönachi yödzö ni'.

<sup>9</sup> Zoë' Simón, tu bönni' zí'alö gúquië' bönni' udzá' unë ya'a lu yödzö na', bönni' guzxi' yé'enë'

bönachi Samaria na', gunné' lë cazë' náquië' bönni' nayëpisetërë'. <sup>10</sup> Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nné': "Bönni' ni dë lu në'ë yöl-la' huáca zxön queë' Dios." <sup>11</sup> Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' unë ya'a queë'.

<sup>12</sup> Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. <sup>13</sup> Ní'irö guyéajlë'ë ca' Simón na', en bidilë' nisa, ate' gudálientica'së' tsözxön Felipe na'. Cate' bilé'enë' yugu' yöl-la' huáca zxön, en yugu' le taca bë' runë' Felipe, bubáninë' Simón na'.

<sup>14</sup> Cate' yugu' gubáz na' nasöl-lë'ë Cristo nacu'ë Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'. <sup>15</sup> Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. <sup>16</sup> Ga bidxintë dza na', bití' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús. <sup>17</sup> Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

<sup>18</sup> Cate' bilé'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unnë' quizzjë' légaquië' dumí, <sup>19</sup> ate' rë' légaquië':

—Benna ca' yöl-la' huáca ni quia', para cate' ixóa na'a núti'tës bönachi, idisóalenë' Dios Bö' Lá'ayi nu



na’.

<sup>20</sup> Ní’irö Pedro gudxë’ lë’, rnnë’:

—Initi dumí quiu’ tsözxön len li’, tu’ réquinu’ len dumí idéli’nu’ yöl-la’ huáca queë’ Dios. <sup>21</sup> Biti’ nacu’ bachi gútsu’u lë ni, tu’ dxía le naca ruá’ dö’ icja ládxi’do’o lahuë’ Dios. <sup>22</sup> Bubí’i ládxi’ ca naca huiá’ dö’ ni runu’, en gúta’yu lahuë’ Dios, nadxi ca’ uniti lahuë’ li’ ca naca lë ni rizá’ ládxi’u. <sup>23</sup> Réquibe’eda’ nabágu’u xíguia’, en nadzunu’ lu yalaj que tu’ xihui’.

<sup>24</sup> Ní’irö bubi’ë didza’ Simón na’, rë’ légaquië’:

—Buli’lídze’ Dios, gáta’yuli’ lahuë’ Xanru’ ni’a quia’ neda’ para cabí gaca quia’ nitú lë na’ chigunnáli’.

<sup>25</sup> Cate’ Pedro, en Juan na’ budxi gulunë’ ba nalí queë’ Cristo lu yödzö ni’, en bulu’siyönnë’ légaquië’ xtídzë’ë Dios, gulunë’ ca’ libán que didza’ dxi’a yugu’ lu ládzagaquië’ bönni’ Samaria, ate’ gudödi ni’ yöjhuöjgaquië’ Jerusalén.

### *Felipe, en tu bönni’ Etiopía*

<sup>26</sup> Ní’irö tu gubáz lá’ayi queë’ Xanru’ bë’lenë’ Felipe didza’, en gudxë’ lë’:

—Guyasa, en guyéaj saca’ ga ridödi gubidza beo’ ziaga. Idxinu’ ga ni’ nalá’ nöza zeaj Jerusalén zéajtë yödzö Gaza, nöza na’ ridödi lu lataj cá’asö.

<sup>27</sup> Ní’irö guyu’ë nöza Felipe na’, sa’yéajë’. La’ nöza ni’ yöjtságuië’ tu bönni’ Etiopía, náquië’ bönni’ huödx. Luyú Etiopía náquië’ bönni’ huen dxin lo queënu Candace, nigula na’ rinná bé’enu bönachi Etiopía na’, en yu’u lu në’ë yúgu’të yöl-la’ tsahui’ queënu dzö’ö lídxinu. Guyijë’ Jerusalén bönni’ ni para guyéaj ládxi’ë Dios. <sup>28</sup> Na’a, söhuöjë’ ladzë’,

rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios.

<sup>29</sup> Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

<sup>30</sup> Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

<sup>31</sup> Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yue' lahuë' Felipe cuenë', en cõ'lenë' lë' tsözxõn lu carreta na'.

<sup>32</sup> Lë na' nazúaj lu guichi rulabë', rnna caní:

Ca bö'cu' zxíla'do',  
gula'chë'ë Lë' para ilútië' Lë',  
en ca bö'cu' zxíla'do',  
biti' rnnëba' cate' nu richugu lítsa'ba',  
ca' benë' Lë', biti' gusalaj ru'ë bi innë'.

<sup>33</sup> Bulu'cá'anë' Lë' cá'asö,  
en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

<sup>34</sup> Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

<sup>35</sup> Ní'irö la' didza' nisö buguelë'ë Felipe, en busiyönnë' lë' didza' dxi'a ca naca queë' Jesús.

<sup>36</sup> Cate' ni' yú'ugaquië' nöza sőjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

<sup>37</sup> Felipe gudxë' lë':

—Channö réajlë'u idú ládXu'u, huáca idilu' nisa.

Lë' bubi'ë didza', rnnë':

—Réajlë'a Jesucristo, náquië' Zxí'inë' Dios.

<sup>38</sup> Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquilë' bönni' huödx na' nisa.

<sup>39</sup> Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bíti'rö bilé'enë' lë'. Ní'irö buguelë'ë xinözë', söhuöjë' rudzéjanë'.

<sup>40</sup> Cate' chiréquibe'enë' Felipe, zoë' lu yödzö Azoto. Gudödë' yúgu'të yödzö ní', ate' benë' libán que didza' dxi'a, ga bidxintë' yödzö Cesarea.

## 9

### *Saulo ruhuöáquië' queë' Cristo*

<sup>1</sup> Ní' ruzenë' bach Saulo nupa ta'yéajlë' Xanru', gú'unne' gútië' légaquië'. Para gunë' caní bidxinë' lahuë' bixúz lo, <sup>2</sup> en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sedë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ní', gaca ichë'ë légaquië' nadzúngaquië' lu yödzö Jerusalén.

<sup>3</sup> Tsanni ní' yú'ugaquië' nöza Saulo, en nupa nacuá'len lë', söjáquië', en cate' chizóa ila'dxinë' Damasco, tsálido'os buzeni'da' tu bení' za' lúzxiba, le buzeni' ga ní' söjáquië'. <sup>4</sup> Ní'irö gudzö'ë Saulo lu yu, en biyönnë' chí'i Nu rë lë':

—Saulo, Saulo, ¿bizx que ribía ládXu'u neda'?

<sup>5</sup> Saulo gunábinë' Lë', gunnë':

—¿Nuzxi li', Xan?

Lë' gunnë':

—Neda' Jesús, Nu ribía ládxi'u. Run zi' cuinu', ridá'bagu'u neda'. Raca quiu' ca na' raca queéba' bēdxi, run zi' cuinba' richégu'ba' yaga tuchi' túndë'ë-ba' zi'.

<sup>6</sup> Ní'irō Saulo guxzízidë'ë, gúdxinë', en gunnë':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzo, ate' ni' isól-la'a quiu' nu guié li' le ral-la' gunu'.

<sup>7</sup> Guládxinë' yugu' bönni' na' sōjácalenë' Saulo, tu' bila'yönnë' chi'i na', sal-la' cuntu nu bila'lé'enë'.

<sup>8</sup> Ní'irō böasë' Saulo luyú, en cate' guxá' guióǰ lahuë', bití' ca' rilé'enë'. Que lë ni na' gula'guélë'ë në'ë, en gula'ché'ë lë' Damasco. <sup>9</sup> Guzöë' ni' tsonna dza nachul-la lahuë', en bití' bi güi' gudahuë'.

<sup>10</sup> Zoë' ca' Ananías, bönni' réajlë'ë Cristo, yödzo Damasco, ate' Xanru' buluí'i lahuë' ga zoë' ca tu lu yëla béchigal, en gudxë' lë':

—Ananías.

Lë' bubi'ë didza', gunnë':

—Ni zoa', Xan.

<sup>11</sup> Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios.

<sup>12</sup> Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóa në'ë lë' para huóalaj guióǰ lahuë'.

<sup>13</sup> Ní'irō bubi'ë didza' Ananías, ré' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca

bönachi ta'yéajlë' Li', nacuá' Jerusalén. <sup>14</sup> Zë'ë ca' ni, dë lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

<sup>15</sup> Ní'irö Xanru' rë' Ananías na', rnnë':

—Guyéaj, tu' gurö caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel. <sup>16</sup> Ulu'ida' lë' le zían le qui'i sáquë'ë uláz quia' neda', gunë' xichina'.

<sup>17</sup> Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahui la' nöza ga ni' zo'o, gusöl-lë'ë neda' para huöálaj guiöj lo', en idisóalenë' Dios Bö' Lá'ayi li'.

<sup>18</sup> La' ní'isö gula'guínnaj le naca ca xilácuba' böla lu guiöj lahuë', ate' la' böáljatë guiöj lahuë'. Ní'irö guyasë' Saulo, en bidilë' nisa. <sup>19</sup> Gudödi ni' gudahuë', en böáca ládxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

### *Runë' libán Saulo lu yödzö Damasco*

<sup>20</sup> La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sedë' queë' Dios, rnnë':

—Jesús náquië' Zxí'ini cazë' Dios.

<sup>21</sup> Bulu'báninë' yúgu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítië' nupa nacuá' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

<sup>22</sup> Bidíparö ládxe'ë Saulo, en benë' ga gula'bö'ë böniga bönni' judío nacu'ë Damasco, tu' bulu'inë légaquië' Jesús naca cazë' Cristo, bönni' na' tunë löza idinná bé'enë' légaquië'.

### *Rulë' Saulo lu ná'agaquië' bönni' judío*

<sup>23</sup> Cate' chigudödi zían dza, gulún xtídza'gaquië' bönni' judío nacu'ë ni' ilútië' Saulo. <sup>24</sup> Rëla, en të dza gula'bö' nísie' yugu' bönni' judío ga nu ridödi lu zö'ö run chi'i yödzö na' para ilútië' lë', pero gúquibe'enë' Saulo le t'ënnë' ilunë' queë'. <sup>25</sup> Ní'irö yugu' bönni' ta'yéajlë'ë Cristo gula'guélë'ë Saulo chi'i dzö'ölö, ate' gula'gu'ë lë' tu lu ga'böra zxön naga' du, en bulu'zötjë' lë' ní'ilö lu zö'ö run chi'i yödzö na'.

### *Rudxinë' Saulo Jerusalén*

<sup>26</sup> Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo. <sup>27</sup> Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bë'lenë' lë' didza', en ca na' benë' Saulo lu yödzö Damasco, len yöl-la' rugu ladxi' benë' libán ca naca queë' Jesús. <sup>28</sup> Ní'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxön. <sup>29</sup> Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. <sup>30</sup> Cate' guléquibe'enë' böchi'ru' ta'yéajlë'ë Cristo lë ni, gula'ché'ë Saulo lu yödzö

Cesarea, ate' gula'sól-lë'ë lë' yödzö Tarso, le naca ladzë' Saulo.

<sup>31</sup> Ní'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bô' Lá'ayi légaquië'.

*Pedro ruúnë' tu bönni' lë' Eneas*

<sup>32</sup> Ia'tú le guca, cate' Pedro yöjyüë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzö Lida. <sup>33</sup> Yöjxáquië' tu bönni' ni' lë' Eneas, chiguca xunu' iz dë' ré'enë', nací'unië' bin.

<sup>34</sup> Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. <sup>35</sup> Yúgu'të nupa nacuá' yödzö Lida, en yödzö Sarón bila'lé'e lë', ate' bulu'huóáca queë' Xanru', tu' chita'yéajlë' Lë'.

*Rátinu Dorcas, en rubannu*

<sup>36</sup> Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Benu nigula ni' zían le nácgaca dxi'a le tácalen bönachi yechi'. <sup>37</sup> Le guca dza ni', güí'inu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. <sup>38</sup> Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'sól-lë'ë chopë' bönni' ga na' zoë', ate' guláta'yüë' lahuë', të' lë':

—Biti' tsenu' guídu' queëtu'.

<sup>39</sup> Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tu'lu'ínu lë' lari' quégaquië' bönni', en nigula, yugu' le bennu Dorcas cate' ni' zóalennu légacanu. <sup>40</sup> Ní'irö Pedro bubéajë' ní'ilö yúgu'të nupa nacua' ni', ate' buzóa zxibë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guiöj lonu Dorcas. Cate' bilé'enu-në' Pedro, la' guyástënu, gurö'önu. <sup>41</sup> Gudélé'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. <sup>42</sup> Ca guca lë' ni guzë' didza' idú lu yödzö Jope, ate' gula'yéajlë' bönachi zían Xanru' Jesús. <sup>43</sup> Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.

## 10

### *Le benë' Pedro lidxë' Cornelio*

<sup>1</sup> Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazí'i lágaquië' Bönni' Italia Röjáquië' Gudil-la. <sup>2</sup> Cornelio na' reaj ládxë'ë Dios, en rádxinë' Lë', ate' yúgu'të bönachi nacua' lidxë' núngaca lë' tsözxön. Runödzië' Cornelio dumí zían le rácalen bönachi yechi', en rulídzatica'së' Dios. <sup>3</sup> Tu dza idú ridödi xihuö bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.



<sup>4</sup> Gúdxinè' Cornelio. Buyúe' gubáz lá'ayi na', en gudxè' lè':

—¿Bizxi rno', Xan?

Gubáz lá'ayi na' gudxè' lè', rnnè':

—Dios riyönnè' le rulidzu'-nè', en nözinè' ca runu', rácalenu' bönachi yechi'. <sup>5</sup> Na'a, gusól-la' yugu' bönni' tsöjäquiè' yödzö Jope tsöjlídzagaquiè' bönni' na' lè' Simón, zoa ia'tú lè' Pedro. <sup>6</sup> Bönni' ni zoè' lidxè' tu bönni' runè' tsahui' guídi zxa bédxi. Bönni' ni, lè'sca' lè' Simón, ate' zoa lidxè' ra' nísado'. Pedro na' guíe' li' le ral-la' gunu'.

<sup>7</sup> Cate' chibuzè'è gubáz lá'ayi na' bé'lenè' lè' didza', bulidzè' Cornelio chópabi' bi'i huen dxin queè', en tuè' bönni' rejè' gudil-la reaj ládxe'è Dios, en dzáguiè' bönachi nacua' lidxè' Cornelio. <sup>8</sup> Cate' budxi busiyönnè' légaquiè' yúgu'tè le guca, gusól-lè'è légaquiè' yödzö Jope.

<sup>9</sup> Dza buropi, tsanni ni' yú'ugaquiè' nöza, en ta'dxinè' gala' ga dè Jope na', la' ní'sö gurenè' Pedro ícjo'olö yu'u para ulidzè' Dios, ni' naca idú huagubidza. <sup>10</sup> La' ná'asö ridunè' Pedro,

en gú'unnè' gahuè', ate' tsanni ni' tu'pè'è queè', bilé'enè' le naca ca tu lu yèla béchigal. <sup>11</sup> Bilé'enè' nayalaj lúzxiba, en ruhuötaj tu le naca ca tu lari' guitsa' zxön ga zoè', le naga' idapa la'a.

<sup>12</sup> Lahui lari' na' dxíagacaba' yugu' böa' guixi' izá'a nacua' tapa ni'a ná'agacaba', en yugu' böa' tá'ayöj lè'egacaba' lu yu, en yugu' böa' zoa xíligacaba'.

<sup>13</sup> Ní'irö biyönnè' chi'i nu ré lè':

—Pedro, guyasa. Béti-gacaba', en gudagu.

<sup>14</sup> Bubi'è didza' Pedro, rnnè':

—¡Calèga, Xan! Catu caz gudahua' le cabí ral-la' gágutu', o le cabí naca dxi'a.

15 Le buropi luzuí biyönnë' chi'i nu na' gudxi lë':  
 —Le nunë' Dios dxi'a, biti' innó' que: “Biti' naca dxi'a.”

16 Tsonna luzuí guca caní, ate' ní'irö la' buëpitë lari' zxön na' lúzxiba. 17 Tsanni ni' rö'ë böniga Pedro, rizá' ládxë'ë bizxi sa'yéaj lë na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxë' Simón na'. 18 Cate' bila'dxinë' ni', bulu'lidzë' nupa nacua' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro. 19 Tsanni ni' rizá' ládxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljé' lí'. 20 Guyaschi na'a, en bötaj zxan yu'u. Biti' gaca chopa ládxu'u tséajlenu' légaquië', tu' nasöl-la'a neda' yugu' bönni' ni.

21 Ní'irö bötjé' Pedro zxan yu'u ga na' nacu'ë bönni' na' nasöl-lë'ë Cornelio, en gudxë' légaquië':

—Neda' bönni' ruguíajli'. ¿Bizxi huen zá'ali' ni?

22 Bulu'bi'ë didza', tē' lë':

—Cornelio, tu bönni' rinná bé'enë' bönni' röjáquië' gudil-la, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bë'lenë' lë' didza', en gudxë' lë' isöl-lë'ë nu udulídza lí' guídu' lidxë' para yönnë' didza' gu'u.

23 Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

24 Dza bunni ni', bila'dxinë' Cesarea. Chizöë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'irönë' lidxë'. 25 Cate' guyázië' Pedro lö'a, birúajë' Cornelio yu'u, yöjtságuië' lë'. Biyéchuë' xini'ë Pedro, en guyéaj ládxe'ë lë' ca runru' queë' Dios caz. 26 Pedro buchisë' lë', en gudxë' lë':

—Guyasa. Lësca' bönachi yödzölió naca' ca nacu' li'.

27 Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'. 28 Ní'irö Pedro gudxë' légaquië', rnnë':

—Libi'ili' nöz quézili' ca rinná bë' xibá queë' Moisés, rnaa biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios bulí'inë' neda' biti' ral-la' innía' queë' nitüë' bönni' náquië' cá'asö o biti' náquië' dxi'a. 29 Que lë' ni na' cate' bulídzali' neda', la' bídatea', en biti' guca chopa ládxa'a. Rinaba' na'a, ¿bizx que na' bulídzali' neda'?

30 Ní'irö bubi'ë didza' Cornelio, gunnë':

—Chiguca tapa dza ca zóaru' na'a, idú ridödi xihuö, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení', dului' lobi' neda'. 31 Caní gúdxibi' neda': “Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'. 32 Na'a, isöl-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a.” 33 Caní guca, la' gusöl-la'tea' nu tsöjlidza' li', ate' tsáhui'do' benu' bidu' ga zóatu' ni.

Que lë ni na' zóatu' ni yúgu'tëtu', nudúbitu' lahuë' Dios para uzë nágatu' le inná bé'enë' Dios li' innó'.

*Didza' bë'ë Pedro lidxë' Cornelio*

<sup>34</sup> Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u. <sup>35</sup> Dios raza ládxë'ë bönachi idútë yödzölió, nupa na' tadxi Lë', en tun le naca dxi'a. <sup>36</sup> Gusöl-lë'ë Dios xtídzë'ë ga nacuá' bönachi Israel, en gusöl-lë'ë nu ben libán que didza' dxi'a, le run ga raza dxi'a quégaca bönachi, lë na' bidxín queëru' lu në'ë Jesucristo. Lë cazë' náquië' Xanru' yúgu'tëru'. <sup>37</sup> Libí'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. <sup>38</sup> Nözili' ca benë' Dios le guca queë' Jesús, bönni' Nazaret. Gusöl-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruúnë' yúgu'të nupa gula'guí'i gula'zaca' lu na' tu' xihui'. Caní benë', tu' guzóalenë' Dios Lë'. <sup>39</sup> Na'a, netu' runtu' ba nalí que yúgu'të lë na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz. <sup>40</sup> Ní'irö Dios busubanë' Lë' cate' guca tsonna dza nátië', en benë' ga bulu'í'i lahuë' ga zóatu' netu'. <sup>41</sup> Biti' bulu'í'i lahuë' lógaca yúgu'të bönachi, pero lotu' netu' bulu'í'i lahuë'. Dios guröë' netu' dza ni'te para guntu' ba nalí queë' Jesús, ate' güí'i gudágulentu' Lë' tsözxön gudödi bubanë' lu yöl-la' guti. <sup>42</sup> Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa

cazë' Dios para uchi'a usöröë' nupa nabángaca, en nupa chinátigaca. <sup>43</sup> Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

*Dios Bö' Lá'ayi ridisóalenë' bönachi izá'a*

<sup>44</sup> Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. <sup>45</sup> Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' biti' nácacaga judío. <sup>46</sup> Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön. <sup>47</sup> Ní'irö bë'ë didza' Pedro, gunné':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

<sup>48</sup> Gunná bë'ë Pedro ila'dilë' nisa tu' nazí lu ná'agaquië' Lë' Xanru' Jesús. Ní'irö yugu' bönni' ni' guláta'yue' lahuë' Pedro ugá'analenë' légaquië' ca chopá tsonna dza.

## 11

*Didza' bë'ë Pedro lógaca bönachi queë' Cristo nacué' Jerusalén*

<sup>1</sup> Bila'yönnë' gubáz nasöl-lë'ë Cristo, en böchi'ru' nacué luyú Judea ca na' bönni' biti' nácacagaquië' judío gula'zí' lu ná'agaquië' xtídzë'ë Dios. <sup>2</sup> Cate' budxinë' Pedro Jerusalén, böchi'ru' judío gula'dí-lalenë' lë' didza'. <sup>3</sup> Gulë' Pedro:

—¿Bixz que yöjtsú'ulenu' bönni' biti' nácagaquië judío, en gudágulenu' légaquië' tsözxön?

<sup>4</sup> Ní'irö gusí lahuë' Pedro rusiyönnë' légaquië' idútë lë na' guca, rnnë':

<sup>5</sup> —Guzóa' lu yödzö Jope, en cate' ni' rulidza'-në' Dios, bilé'eda' ca tu lu yëla bëchigal tu le buluí'inë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxín ga na' zoa'. <sup>6</sup> Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacua' tapa ní'agacaba', yugu' böa' guixi' sínia', en böa' tá'ayöj lë'egacaba' lu yu, en böa' zoa xíligacaba'. <sup>7</sup> Biyönda' chi'i nu gudxi neda': "Pedro, guyasa. Bëti-ba', en gudagu." <sup>8</sup> Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." <sup>9</sup> Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a." <sup>10</sup> Tsonna luzuí guca caní, ate' ní'irö idútë lë na' bilé'eda' la' buëpitë lúzxiba. <sup>11</sup> La' ní'isö bila'dxintë' tsonnë' bönni' ra' yu'u ga na' zoa', narúajgaquië' yödzö Cesarea, nasöl-lë'ë légaquië' tu bönni' lë' Cornelio. Sududíljagaquië' neda'. <sup>12</sup> Dios Bö' Lá'ayi gudxë' neda': "Guyéajlen légaquië', en cabí gaca chopa ládxu'u." Lësca' izxópatë' böchi'ru' ni gula'zá'lenë' neda' tsözxön. Guyéajtu' Cesarea, ate' guyaztu' lidxë' tu bönni' zoë' ni'. <sup>13</sup> Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë': "Na'a isöl-la'gacu'-në' bönni' tsöjáquië' yödzö Jope, tsöjlídzagaquië' Simón, zoa ia'tú lë' Pedro. <sup>14</sup> Bönni' na' usiyönnë' li' naca gaca uló' li', en ulu'lágaca

ca' yúgu'të bönachi nacuá' lidxu'." <sup>15</sup> Cate' ni' gusí lahua' ru'ílena' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö. <sup>16</sup> Ní'irö yöjneda' didza' na' bë'ë Xanru', gunnë': "Le nácatë Juan buquilë' bönachi nisa lu nisa, pero libí'ili', gaca queëli' le rulu'isö yöl-la' ridila nisa na', idisóalenë' Dios Bö' Lá'ayi libí'ili'." <sup>17</sup> Que lë ni na', channö Dios gusöl-lë'ë Dios Bö' Lá'ayi quégaquië', la' tuz ca benë' queëru' rë'u réajlë'ëru' Xanru' Jesucristo, ¿núzxitë neda' inná bé'eda'-në' Dios?

<sup>18</sup> Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' bití' nácagaquië' judío, tu'bí'i ládxi'gaquië' para ila'déli'në' yöl-la' na'bán idú.

### *Yugu' bönni' nacu'ë Antioquía ta'yéajlë'ë Cristo*

<sup>19</sup> Cate' ni' yugu' bönni' judío bití' ta'yéajlë'ë gulútië' Esteban, en gula'bía ládxi'gaquië' ia'zíca'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacasö bönachi judío. <sup>20</sup> Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ílenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. <sup>21</sup> Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

<sup>22</sup> Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'söl-lë'ë Bernabé tséajë' Antioquía na'. <sup>23</sup> Cate' Bernabé na' bidxinë' Antioquía, bilé'enë' le ruzá' ládxë'ë Dios quégaquië', en budzëjanë'. Guchízië' icja nágagaquië' para ila'día'tica'së' queë' Xanru' idú ládxí'gaquië'. <sup>24</sup> Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ni'a que libán benë' Bernabé na', bönachi zían lu yödzö na' gula'yéajlë' Xanru'.

<sup>25</sup> Gudödi ni', guyijë' Bernabé na' yödzö Tarso, yöjdiljë' Saulo. Cate' budzölinë' lë', buchë'ë lë' Antioquía. <sup>26</sup> Idú ca tu iz gula'cu'ë ni', tunë' tsözxön bönachi queë' Cristo, en tu'sëdinë' bönachi zían. Lu yödzö Antioquía na', gusí lo gula'zì' lágaquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

<sup>27</sup> Dza ni' bila'rúajë' Jerusalén, en yöjáquië' Antioquía bal-lë' bönni' tu'ë didza' uláz queë' Dios. <sup>28</sup> Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Si' gaca gubín idútë yödzölió.

Guca gubín na' cate' ni' rinná bë'ë Claudio, lu yödzö Roma. <sup>29</sup> Ní'irö gula'zì' lu ná'agaquië' bönni' ta'yéajlë'ë Cristo nacu'ë Antioquía, ila'söl-lë'ë tsca le dësö que quégaquië', le gácalen böchi'ru' nacu'ë luyú Judea. <sup>30</sup> Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chí'ë bönachi queë' Cristo nacu'ë Judea.



## 12

### *Tútië' Jacobo, en ta'gu'ë Pedro lidxi guié*

<sup>1</sup> Dza na' Herodes, bönni' unná bē', benē' ga gula'zönē' bal-lē' bönni' queē' Cristo para ulu'saca' zi'ë légaquiē'. <sup>2</sup> Gunná bé'enē' bönni' gulútiē' Jacobo, böch'ë Juan. Gulu'ë lē' guié tuchi'. <sup>3</sup> Cate' gúquibe'enē' Herodes gula'yaza ládxi'gaquiē' bönni' judío lē ni, benē' ga gula'zönē' ca' Pedro. Gulaca lē ni dza ni' raca laní cate' tahuē' yōta xtila biti' nazí'i cúa zi que. <sup>4</sup> Gudödi gula'zönē' Pedro, gula'gu'ë lē' lidxi guié, en bulu'dödē' lē' lu ná'agaquiē' tapa cō' bönni' röjáquiē' gudil-la, nacu'ë tapē' tu huéaj cō' na', para uyúgaquiē' lē'. Yu'u ládxi'ë Herodes ubéajē' Pedro lógaca bönachi tödi Laní Pascua, laní na' tu'subanē' ca benē' Dios, bubéajē' bönachi judío luyú Egipto. <sup>5</sup> Caní guca, nun chí'igacrē' Pedro lu yu'u lidxi guié na', pero bönachi queē' Cristo bulu'lídzatica'sō Dios, ta'nábini Dios gácalenē' Pedro.

### *Dios rubéajē' Pedro lidxi guié*

<sup>6</sup> Cate' si' idxín dza yu'u ládxi'ë Herodes ubéajē' Pedro lidxi guié na', la' dzō' ní'sō dē' rásiē' Pedro, ate' nacu'ë chopē' bönni' röjáquiē' gudil-la cuita lē'ë Pedro na', en núga'gaquiē' lē' chopa du guié. Gula'cu'ë ia'bal-lē' bönni' röjáquiē' gudil-la tapa chi'ë ga nu riyaza lidxi guié na'. <sup>7</sup> Tsárido'os bulufí lahuē' tu gubáz lá'ayi queē' Xanru' ni', ate' buzení'da' bení' lidxi guié. Gudanē' gubáz lá'ayi na' cuita lē'ë Pedro, ate' busubanē' lē', en gudxē' lē':

—Guyaschi.

Ní'irö bulu'huédxi du guíë na' naga' ni'a nëë Pedro. <sup>8</sup> Gubáz lá'ayi na' gudxë' lë', gunnë':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdz'u, en gudá' len neda'.

<sup>9</sup> Burúajë' Pedro, sa'yéajlenë' gubáz lá'ayi na', pero bití' réquibe'enë' nácatë le runë' gubáz lá'ayi na'. Gúquinë' yélasö rinenë'. <sup>10</sup> Cate' chigula'dödë' ga nacu'ë bönni' zí'alö, en bönni' buropi cö', bönni' na' rójáquië' gudil-la tapa chi'ë, bila'dxinë' ga zoa le néquini guíë le nusayaj ga nu riyaza lidxi guíë na', ga nu rurúaj la' nöza que yödzö. Ga nu riyaza na', rácasö que guyalaj. Cate' bila'rúajë' ni', gula'zë'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro. <sup>11</sup> Ní'irö réquibe'enë' Pedro, ate' lu icja ládxi'da'azë' gunnë':

—Na'a chinözda' le nácatë gusöl-lë'ë Xanru' gubáz lá'ayi queë', en busölë' neda' lu nëë Herodes, en lu yúgu'të le gulë'ënnë' bönni' judío ilunë' quia'.

<sup>12</sup> Tsanni ni' yu'ë nöza Pedro, rizá' ládxi'ë ca naca lë na' guca, ate' bidxinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios. <sup>13</sup> Cate' bulidzë' Pedro ra' yu'u lö'a, birúajbi' bi'i nigula lëbi' Rode para inözibi' nuzxi na'. <sup>14</sup> Cate' bünbë'ëbi' bi'i nigula ni chi'ë Pedro, lu yöl-la' rudzeja queëbi' bití' gusaljbi' yu'u, pero carelö böajbi' lu yu'u, yöjtíxjöi'ibi' nupa nacua' ni', rnnabi':

—Zoë' Pedro ra' yu'u.

15 Ní'irö gulé' lëbi':

—Nachixi icju'.

Lëbi' tsútsurö ben xtída'bi' naca caní. Ní'irö gula'nné':

—Calëga lë'. Bixín queë' na'.

16 Tsanni na' bití' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lë'. 17 Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guié. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

18 Cate' za' rení' dza na', bönni' röjáquië' gudil-la gula'bö'ë böniga nacxi guca, bití'rö yu'ë Pedro lidxi guié. 19 Ní'irö gusöl-lë'ë Herodes nupa tsöjxí'gaca Pedro. Cate' bití' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bétigaca yugu' bönni' na' röjáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ni'.

### *Ca gútië' Herodes*

20 Dza ní'isö rilenë' Herodes bönachi yödzö Tiro, en yödzö Sidón. Zí'alö bönachi lu xiyúë' Herodes na' gula'söl-la' le biyadzaj quégaca bönachi lu xiyúgaca yödzö Tiro, en Sidón na', pero tu' rilenë' Herodes légaquië', bití'rö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo

lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'. <sup>21</sup> Ní'irö budxië' bë' Herodes dza yönnë' légaquië', ate' dza na' gurö'ë xilatjë' ga ruchi'a rusöröë' bi raca, nácuë' lari' nazaca', en benë' libán lógaquië'. <sup>22</sup> Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

<sup>23</sup> La' ná'asö la' bë'të' gubáz lá'ayi queë' Xanru' lë' tu' buzi'ë lë' cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

<sup>24</sup> Ní'irö guca libán que xtídzë'ë Xanru', ate' gula'yán nupa nazí' lu ná'agaca le.

*Le zí'alö luzuí röjéngaquië' Bernabé, en Saulo libán*

<sup>25</sup> Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zë'ë ni', yöjhuöjgaquië' yödzö Antioquía. Gula'ché'ë-bi' ca' bi'i Juan, zoa ia'tú labi' Marcos.

## 13

<sup>1</sup> Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzö Antioquía, tunë' tu zxön bönachi queë' Cristo lu yödzö na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlenë' tsözxön Herodes, bönni' rinná bë'ë luyú Galilea).

<sup>2</sup> Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

<sup>3</sup> Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'söl-lë'ë légaquië'.

*Yugu' gubáz nasöl-lë'ë Cristo tunë' libán luyú Chipre*

<sup>4</sup> Ní'irö yöjáquië' Bernabé, en Saulo yödzö Se-leucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazí'i le Chipre.

<sup>5</sup> Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sëdë' queë' Dios. Nachë'gaquië'-bi' bi'i Juan para gunbi' légaquië' tu zxön.

<sup>6</sup> Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë yë'ë, en rnnë' ru'ë didza' uláz queë' Dios.

<sup>7</sup> Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'ënë' yönnë' xtídzë'ë Dios.

<sup>8</sup> Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönachi izá'a ga na'.

<sup>9</sup> Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na' <sup>10</sup> en rë' lë':

—Li, bönni' rizí' yë', en bönni' huiá' dö', nacu' ca xzí'ini caz tu' xihui', en bönni' biti' rilé'ené' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu ré'ëni tséajlë' Lë'? <sup>11</sup> Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudé' nilö ná'alö, riguiljé' nuzxi sön në'ë para ichë' lë'. <sup>12</sup> Cate' bilé'ené' bönni' unná bë' na' lë na' guca, bubáninë' ca naca xtídzë'ë Xanru', ate' guyéajlë'ë Cristo.

*Le gulunë' Pablo, en Bernabé lu yödzö Antioquía luyú Pisidia*

<sup>13</sup> Ní'irö buzë'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'aleni' légaquië', en böajbi' Jerusalén. <sup>14</sup> Gudödi ni' bulu'zë'ë Perge na', en yöjáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë. <sup>15</sup> Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'söl-lë'ë nu yöjödix Saulo, en Bernabé, gunné':

—Libi'ili', böchi'tu'. Channö nuá'ali' bi innali' le uzéajni'i netu', guli'nnë'.

<sup>16</sup> Ní'irö guzuínë' Pablo, en guchisa në'ë para ila'cu'ë dxisö, gunné':

—Buli'zě nágali' le guía' libí'ili', bönni' Israel, en libí'ili', núlöli' rádxi'li'-nē' Dios. <sup>17</sup> Xanru' Dios, Nu ta'yéaj ládxi'gaca bönachi Israel, gurö cazē' xuz xtó'oru', en benē' ga gula'yándē'ē cate' ni' nácagaquiē' bönni' zi'tu' luyú Egipto. Len yöl-la' huáca zxön queē' bubéajē' légaquiē' luyú ni'. <sup>18</sup> Idú choá' iz Dios biá' gulénē' quégaquiē' cate' ni' gula'dē' idú luyú bidxi lu lataj cá'asö. <sup>19</sup> Cate' budxi busunítiē' gadxi cö' yödžö gula'cuá' luyú Canaán, bunödžjē' xiyúgaca bönachi ni' quégaquiē' xuz xtó'oru'. <sup>20</sup> Gudödi ni', le guca idú ca tapa gayuá' yu' chi-un iz, Dios bucu'ē yugu' bönni' bulu'chi'a bulu'söröē' légaquiē' ga bidxintē zoē' Samuel, bönni' bē'ē didza' uláz queē' Dios. <sup>21</sup> Ní'irö gula'nábinē' Dios uzöē' tu bönni' unná bē' quégaquiē'. Dios guröē' Saúl, zxí'inē' Cis, bönni' nababē' di'a dza queē' Benjamín. Idú ca choá' iz gunná bé'enē' Saúl na' légaquiē'. <sup>22</sup> Gudödi ni' Dios gudúē' Saúl na', ate' buzöē' David quégaquiē' para inná bē'ē. Dios benē' ba nalí queē' David ni, gunné': “Nözda' runē' David, zxí'inē' Isaí, le raza ládxa'a, en gunē' yúgu'tē le rē'ēnda' neda'.” <sup>23</sup> Ladaj zxí'ini xi'sóē' David na' benē' Dios ga guljē' Jesús para gáquiē' bönni' usölē' bönachi Israel, ca na' guzxi' lu nē'ē Dios zí'atëlö gunē'. <sup>24</sup> Zí'alö cate' si' ilá' lahuē' Jesús, benē' Juan libán lógaca yúgu'tē bönachi Israel para ulu'bí'i ládxi'gaca, en ila'dila nisa. <sup>25</sup> Cate' ni' chizóa údxi gunē' libán Juan na', gunné': “¿Nuzxi réquili' naca' neda'? Biti' naca' Cristo, bönni' na' ral-la' guídē'. ¡Na'a, buli'yútsöca! Chizöē' idxinē' bönni' na' ga zoa' ni, ate' neda' bití' naca' lesaca' ilecja' xiráchuē' nudē'ē.”

26 'Libí'ili', böcha'a, yugu' xzí'ini xi'sóè' Abraham, en núlöli' zóali' ni, en rádxili'-nè' Dios. Dios caz gusöl-lè'è queëli' didza' ni para uláli'. 27 Nupa nacuá' Jerusalén, en bönni' ta'nná bé'enè' légaquië' bití' bulu'únbè'è Jesús, en bití' gula'yéajni'inè' le nazúaj lu guichi le gula'nnè' yugu' bönni' gulu'è didza' uláz queë' Dios, sal-la' tu'laba cazè' yugu' didza' ni yugu' dza lá'ayi. Lu yöl-la' cabí réajni'i quégaquië' gulunè' ga budxín ca rnna didza' ni cate' ni' gula'chúguië' queë' Jesús gátie'. 28 Sal-la' bití' budzöli le nabáguë'è Jesús gátie', gula'nábinè' Pilato inná bé'enè' bönni' ilútië' Lè'. 29 Cate' budxi gulunè' queë' yúgu'tè le nazúaj lu guichi ca ralla' gaca queë', bulu'zötjè' Lè' lè'e yaga cruz, en bulu'cáché'è Lè' yeru ba. 30 ¡Ní'irö Dios busubanè' Lè' lu yöl-la' guti! 31 Zían dza buluí'i lahuë' Jesús lógaca nupa yójácalen Lè' tsözxón cate' ni' buzè'è luyú Galilea, en bidxinè' Jerusalén. Na'a, yugu' bönni' na' tunè' ba nalí queë' lógaca bönachi.

32 'Caní naca, lësca' netu' ni rusiyöntu' libí'ili' didza' dxi'a ca naca lè na' guzxí' lu në'è Dios gunè' quégaquië' xuz xtó'oru'. 33 Lè na' guzxí' lu në'è Dios quégaquië', Lè cazè' benè' ga budxín queëru', nácaru' xzí'ini xi'sóagaquië'. Caní benè' cate' busubanè' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza' Li'." 34 Ca naca na', Dios busubanè' Lè' lu yöl-la' guti para cabí initi le naca cazè', Lè cazè' Dios gunnè' caní: "Gonna' quiu' le nácagaca bica' ba guzxí' lu na'a lahuë' David." 35 Que lè ni na' nazúaj ca' lu guichi, ga zoa ia'tú salmo, le rnna caní: "Bití' gu'u lataj ugá'anè' bönni' lá'ayi quiu' ga initi le naca cazè'." 36 Le guca



queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. <sup>37</sup> Na'a, ca naca queë' Jesús na', Dios busubanë' Lë', ate' biti' guniti le naca cazë' lu yeru ba. <sup>38</sup> Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. <sup>39</sup> Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugú'a xibá queë' Dios, le bë'ë Moisés. <sup>40</sup> Guli'gún chi'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

<sup>41</sup> Buli'yútsöca', libí'ili', bönni' cabí tunë' neda' bal. Ubánili', pero lu yöl-la' cabí réajlë' queëli' gátili'. Neda' guna' tu dxin dza ni zóali', en sal-la' nu uluí' libí'ili' le ruluí' dxin na', biti' ca' tséajlë'ëli'.

<sup>42</sup> Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu lógaquië' ulu'sëdinë' légaquië' ca naca lë ni cate' idxín ia'tú dza lá'ayi quégaquië'. <sup>43</sup> Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxón Pablo, en Bernabé. Chopë' ni' gulu'ilenë' légaquië' didza', en bulu'së'ë ládxi'gaquië' para ilácatíca'së' tsutsu, ilunë' löza le ruzá' ládxi'ë Dios quégaquië'.

<sup>44</sup> Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgutë

bönachi lu yödzö na' para ila'yönnë' xtídzë'ë Dios. <sup>45</sup> Ní'irö bulu'zxé'enë' bönni' judío bití' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. <sup>46</sup> Ní'irö lu yöl-la' rugu ladxi' quégaquië' Pablo, en Bernabé, gulé' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' bití' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a. <sup>47</sup> Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a, en gacu' Nu usólá bönachi idútë yödzölió.

<sup>48</sup> Cate' bila'yöni bönachi izá'a nacua' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. <sup>49</sup> Caní guca, guzé xtídzë'ë Xanru', ate' bila'yöni bönachi yúgu'të yödzö nacua' luyú ni'. <sup>50</sup> Ní'irö bönni' judío bití' ta'yéajlë'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'. <sup>51</sup> Ní'irö Pablo, en Bernabé bulu'quinnajë' yu bëchtö da' la' lábagaquië' le rulu'í' nagá'ana xíguia' nabága'gaca bönachi lu yödzö na', ate' yójáquië' lu yödzö Iconio. <sup>52</sup> Bulu'dzéjanë' bönni' yödzö Antioquí'a na', bönni'

ta'yéajlë'ë Xanru', ate' guzóalenë' Dios Bõ' Lá'ayi légaquië'.

## 14

### *Le gulunë' Pablo, en Bernabé lu yödzo Iconio*

<sup>1</sup> Cate' bila'dxinë' Pablo, en Bernabé yödzo Iconio, gula'yu'ë tsözxõn lu yu'u ga tu'dubë' bönni' judío, en tu'sedë' queë' Dios, ate' gulu'ë didza' ni'. Caní guca, zían bõnachi judío, enca' zían bõnachi izá'a gula'yéajlë' Cristo. <sup>2</sup> Ní'irõ bönni' judío biti' ta'yéajlë'ë gula'gú'u yõl-lë'ë bal-lë' bönni' izá'a, para cabí ila'lë'enë' dxi'a böchi'ru' ta'yéajlë'ë Cristo. <sup>3</sup> Tu' gula'yéajlë' bõnachi zían na' Cristo, gula'cu'ë Pablo, en Bernabé ni' zían dza, ate' lu yõl-la' rugu ladxi' gulu'ë xtídzë'ë Dios, tu' tu'zxõni lãdxi'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' lãdxë'ë Dios quégaca bõnachi, tu' bë'ë légaquië' lataj gulunë' yugu' le taca bë', en le tun ga tu'bani bõnachi. <sup>4</sup> Ní'irõ bõnachi lu yödzo na' bila'ruáj choplõ. Bal-lë' gula'dë'ë bönni' judío biti' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasõl-lë'ë Cristo. <sup>5</sup> Ní'irõ bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö quégaquië' gubáz na' nasõl-lë'ë Cristo, en ulu'lãdxë' légaquië' guiõj. <sup>6</sup> Cate' téquibe'enë' Pablo, en Bernabé lë ni, bulu'zxúnnajë' ni', yõjáquië' yödzo Lистра, en Derbe luyú Licaonia, ate' gula'dödë' yúgu'të yödzo' idú gásibi'ilõ ni', <sup>7</sup> gapa ni' gulunë' libán que didza' dxi'a ca naca queë' Cristo.

*Tu'lãdxë' Pablo guiõj lu yödzo Lистра*

<sup>8</sup> Zoë' tu bönni' lu yödzö Lистра biti' raca sē'ë. Rõ'ösë' ni' tu' cabí rizé'ë cate' ni' guljë', en catu caz guzë'e ni'ë. <sup>9</sup> Bönni' ni ruzé náguië' didza' ru'ë Pablo. Pablo buyúë' lë', en gúquibe'enë' réajlë'ë Cristo para huóáquië'. <sup>10</sup> Ní'irö Pablo bē'ë zidzaj didza', en rē' lē':

—Guzuí.

La' guxítitē' bönni' na', en guzë'e ni'ë. <sup>11</sup> Cate' yugu' bönni' Lистра bila'lé'enë' lë' na' benë' Pablo, gula'sí lógaquië' tu'ë zidzaj didza' lu didza' tu'ë bönni' Licaonia na', ta'nnë':

—¡Yugu' dios bönni' ni! ¡Nuhuötjagaquië' ga zóaru', en tu'luí'i cuíngaquië' ca nácagaquië' bönni'!

<sup>12</sup> Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia'tú dios quégaquië'. Caní gula'nnë' tu' ru'ë didza' Pablo ca na' ta'nnë' runë' Mercurio na'. <sup>13</sup> Zoa yudo' que Júpiter ga ni' nacu'ë, cuita nõza ga ni' ta'yaza bönachi lu yödzö na'. La' bidxintē' bixúz que Júpiter na', nachë'ë-ba' yugu' bēdxi, en nu'ë ca' yugu' bregui' yöj, ate' dzágagaca bönachi zían lë'. Gulë'ënnë' ilútië'-ba' bēdxi na' lógaquië' Pablo, en Bernabé para ila'yéaj lādxi'gaquië' légaquië' ca tunë' quéga dios quégaquië'. <sup>14</sup> Cate' Bernabé, en Pablo, gubáz na' nasöl-lë'ë Cristo, guléquibe'enë' lë' ni, gula'chözë' lari' nácugaquië'. Tu'huí'ininë' tu' tunë' bönni' ni le cabí ral-la' ilunë', ate' gula'xítie', en yöjcu'ë gatsaj láchui'lö bönachi zían na', en gulu'ë zidzaj didza', tē' légaquië':

<sup>15</sup> —¡Libí'ili' bönachi! ¿Bizx que runli' caní? Lësca' bönni' ca libí'ili' nácatu', en riguíxjö'itu' libí'ili' lë' ni caz ral-la' ucá'anali', le cabí nácate', para guéquili' queë' Dios ban. Dios ni benë' lúxriba, en yödzölió,

en nísado', en yúgu'të le nacuá' tu tu lataj na'.  
<sup>16</sup> Yugu' iz chigula'dödi, gulún yúgu'të bönachi ca  
 rnnasö que queëguequi, ate' Dios biti' buzáguëë  
 xinözguequi, <sup>17</sup> pero benë' ga gulaca le tun ba  
 nalí queë', yugu' le nácagaca dxi'a benë' quégaquië'.  
 Risöl-lëë queëru' nisa guiöj, en runë' ga ta'yán  
 le rázaru'. Ruzölaj rudzé'enë' rë'u, en runë' ga  
 rudzeja ládxi'ru'.

<sup>18</sup> Sal-la' Bernabé, en Pablo gulë' légaquië' caní,  
 cánnisö bila'déli'në' bulu'záguëë xinözguequi  
 bönachi zían na', para cabí ilútië'-ba' bëdxi na'  
 lógaquië'.

<sup>19</sup> Ní'irö bal-lë' bönni' judío biti' ta'yéajlë'ë,  
 narúajgaquië' Antioquía, en Iconio, bila'dxinë'  
 ni', ate' gula'gú'u yól-lë'ë bönachi zían na'. Ní'irö  
 yúgu'të' bulu'ladxë' Pablo guiöj, en gulá'ayöjë' lë'  
 ní'ilö ra' yödzo na', tu' téquinë' chinátië'. <sup>20</sup> Ní'irö  
 bulu'dubë' yugu' bönni' ta'yéajlë'ë Cristo idú  
 gásibi'ilö ga dë' Pablo. Guyasë' lë', en buázië' lu  
 yödzo na'. Cate' za' rení' ia'tú dza, burúajlenë'  
 Bernabé, yöjáquië' yödzo Derbe.

<sup>21</sup> Lu yödzo ni' gulunë' libán que didza' dxi'a  
 ca naca queë' Jesucristo, ate' bönachi zían ni'  
 gula'yéajlë' Cristo. Gudödi ni' yöjhuöjgaquië'  
 Listra, en Iconio, en Antioquía. <sup>22</sup> Cate' gula'dödë'  
 Bernabé, en Pablo yugu' yödzo na', bulu'tipë'  
 ládxi'gaquië' bönni' ni' ta'yéajlë'ë Cristo, en  
 bulu'së'ë ládxi'gaquië' ulu'gá'anë' tsutsu ca na'  
 ta'yéajlë'ë Lë'. Gulë' légaquië':

—Rë'u tsaza cázaru' ga rinná bë'ë Dios, run  
 bayudxi quí'i sáca'ru' zían le gaca queëru'.

<sup>23</sup> Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chiguluí'ilenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

*Pablo, en Bernabé tu'dxinë' Antioquía luyú Siria*

<sup>24</sup> Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia. <sup>25</sup> Budxi gulunë' libán que xtídzë'ë Cristo lu yödzö Perge, yöjáquië' yödzö Atalia. <sup>26</sup> Bulu'zë'ë ni', ate' gula'benë' tu lë'e barco, en bulu'dxinë' yödzö Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'. <sup>27</sup> Cate' ni' bulu'dxinë' Antioquía, bulu'dubi bönachi queë' Cristo nacúa' ni'. Ní'irö Pablo, en Bernabé bulu'siyönnë' légaquië' ca náagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. <sup>28</sup> Pablo, en Bernabé bulu'gá'analenë' bönachi ni' ta'yéajlë' Cristo zían dza.

## 15

*Tu'dubë' huen dxin queë' Cristo lu yödzö Jerusalén*

<sup>1</sup> Ní'irö bal-lë' bönni' narúajgaquië' luyú Judea bila'dxinë' yödzö Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipéla'li' ca nalëbitu' runtu' ca na' gunná bë'ë Moisés, bití' gaca uláli'.

2 Ní'irö Pablo, en Bernabé gula'díl-lalenë légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para ilu'ílenë' légaquië' didza' ca naca lë ni raca, tu'sedinë' bönni' na' bönachi le nachixi.

3 Ní'irö yugu' bönni' queë' Cristo nacu'ë Antioquia bulu'gu'ë légaquië' nōza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huöáquië' bönni' izá'a queë' Cristo. Lë ni ben ga bulu'dzëjanë' yúgu'të böchi' luzá'aru' ni'.

4 Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. 5 Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipëla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnaa bë' xibá queë' Moisés.

6 Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca. 7 Gudödi gulu'ë zían didza', guzuínë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo. 8 Dios, Nu nunbë' caz le yu'u

icja ládxi'do'gaca bönachi, buzöë' le naca bē' runē légaquiē' bal, gusöl-lē'ë Dios Bō' Lá'ayi quégaquiē', ca na' gusöl-lē'ë Lē' queéru'. <sup>9</sup> Biti' butsé'ë ca benē' quégaquiē', en queéru', en lēasca' bunē' dxi'a icja ládxi'do'gaquiē' tu' ta'yéajlē'ë Cristo. <sup>10</sup> Na'a, ¿bizx que run leli'-nē' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bē' xibá queē' Moisés, biti' guca guá'aru' rē'u, en biti' guca ilu'ë xuz xtó'oru' le. <sup>11</sup> Rē'u ni, réajlē'ëru' nuláru' ni'a que le buzá' ládxi'ë Xanru' Jesús queéru', en ca na' nuláru' rē'u, ulu'lē' ca' légaquiē'.

<sup>12</sup> Cate' budxi bē'ë Pedro didza' ni, yúgu'tē' gula'cu'ë dxisö, ate' bulu'zé nágagaquiē' didza' gulu'ë Bernabé, en Pablo. Bulu'siyönnē' légaquiē' yugu' le taca bē', en le tun ga tu'bani bönachi, yugu' le benē' Dios lu ná'agaquiē' ga nacuá' bönachi izá'a. <sup>13</sup> Cate' Bernabé, en Pablo budxi gulu'ë didza' ni, bubí'ë didza' Jacobo, gunné':

—Libi'ili', böcha'a. Buli'zé nágali' le guía' libí'ili'.

<sup>14</sup> Simón Pedro chigudíxjöi'i quéziné' rē'u ca benē' Dios, bulu'e lahui yöl-la' huáca queē' le zí'alö luzuí lógaca yugu' bönachi izá'a para bubéajē' quez queē' bönachi nútsa'gaca ládjagaquiē'. <sup>15</sup> Ca naca lē ni röjlöz'gaca xtídza'gaquiē' bönni' gulu'ë didza' uláz queē' Dios, ca na' nazúaj lu guichi lá'ayi, rnna:

<sup>16</sup> Dza tödi lē ni huöda', en uchisa' Nu inná bē', bönni' na' tsáziē' xilatjē' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxē', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bē'ë David



17 para ulu'guilaj ia'z'ica'rö bönachi Xanru'.  
 Ulu'guilaj bönachi izá'a Lë',  
 ate' si' láguequi: Bönachi Queë' Dios.

18 Caní rnnë' Xanru',

Nu na' dza ni'te ben ga naca bë' yúgu'të lë ni.

19 'Que lë ni na' runi neda' biti' ral-la' gun  
 níguiru' bönachi izá'a, nupa tu'huöáca queë' Dios.

20 Ral-la' uzúajru' lu guichi quégaquië' ulu'cá'anë'  
 yugu' le biti' ral-la' ilahuë', le nadödi lógaca budó'  
 guiöj budó' yaga, en cabí ilunë' le ruá' dö', en  
 cabí ilahuë' xipéla'gacaba' böa' guixi' biti' narúaj-  
 gacaba' rön, en cabí ilahuë' xichönba' bíti'tës böa'  
 guixi'. 21 Dza ni'te nacuá' yúgu'të yödzö nupa tun  
 libán lu yu'u gapa tu'dübë' bönni' judío, en tu'sëdë'  
 queë' Dios. Tunë' libán ni' que le buzúajë' lu guichi  
 Moisés. Tu'laba cazë' le yugu' dza lá'ayi.

22 Ní'irö gula'yaza ládxi'gaquië' gubáz nasöl-lë'ë  
 Cristo, en bönni' gula tapa chí'ë, en yúgu'të bönachi  
 queë' Cristo, ila'böë' bal-lë' bönni' ladjagaquië', en  
 ila'söl-lë'ë légaquië' Antioquía. Tsöjácalenë' Pablo,  
 en Bernabé. Chopë' na' gula'böë', légaquië' Judas,  
 zoa ia'tú lë' Barsabás, enca' Silas. Nácagaquië'  
 bönni' lo ladjagaquië' böchi'ru' ni'. 23 Bulu'zúajë' lu  
 guichi le bulu'dödë' lu ná'agaquië' ilu'ë, le rna  
 caní:

“Netu', gubáz nasöl-lë'ë Cristo, en bönni' gula  
 tun chí'ë, en yugu' böchi'ru', rugápatu' libí'ili' Dios,  
 böchi'tu', nácali' bönachi izá'a zóali' Antioquía, en  
 yugu' yödzö luyú Siria, en Cilicia. 24 Biyönitu' ca  
 tun bal-la bönachi bila'rúaj ga zóatu', nupa na' biti'  
 nasöl-la'tu'. Dutsá'agaquië' libí'ili' len le ta'nnë',  
 en tu'bequi böniga icja ládxi'do'oli', tu' ta'nná bë'ë  
 irugu lu xipéla'li', en gunli' ca rinná bë' xibá queë'

Moisés. <sup>25</sup> Que lë ni na' guyaza lãdxi'tu' cate' chibén tuz xtídza'tu', gurötu' chopë' bönni', nupa isöl-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'. <sup>26</sup> Chiyöjáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo. <sup>27</sup> Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni. <sup>28</sup> Dios Bö' Lá'ayi bulu'ínë' netu' le raza lãdxë'ë, en lësca' caní raza lãdxi'tu' netu', bití' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

<sup>29</sup> Bití' gáguli' le nadödi lógaca budó' guiöj budó' yaga.

Bití' gáguli' rön.

Bití' gáguli' xipëla'gacaba' böa' guixi' bití' narúaj-gácaba' rön.

Bití' gunli' le ruá' dö'.

Channö gun chi'i cuinli' para gunli' ca rnna yugu' lë ni, gunli' dxi'a."

<sup>30</sup> Caní guca, yugu' bönni' na' nasöl-la'gaquië' bila'dxinë' Antioquía. Bulu'tubë' bönachí queë' Cristo nacua' ni', ate' gula'gu'ë guichi na' lu ná'agaquië'. <sup>31</sup> Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë tsahui' légaquië'. <sup>32</sup> Tu' nácagaquië' Judas, en Silas bönni' tu'ë didza' uláz queë' Dios bulu'huë tsáhuë'ë légaquië', en bulu'tipë' lãdxi'gaquië' böchi'ru' ni', bulu'gunë' dxin didza' zían le gulu'ilenë' légaquië'. <sup>33</sup> Gudödi bulu'dzënë' Judas, en Silas ni' nababa dza, ní'irö böchi'ru' ni' bulu'zenë' légaquië' dxi'a didza' para tsöjhuöajgaquië' Jerusalén ga nacu'ë bönni'

gula'söl-lë'ë légaquië'. <sup>34</sup> Guyaza ládxë'ë Silas bugá'anë' Antioquía. <sup>35</sup> Bulu'gá'anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

*Risí lahuë' Pablo röjenë' libán le buropi luzuí*

<sup>36</sup> Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' böchi'ru' nacu'ë yúgu'të yödzö gapa chiyöjenru' libán que xtídzë'ë Xanru', para ilé'eru' nacxi raca quégaquië'.

<sup>37</sup> Gú'unnë' Bernabé ila'ché'ë-bi' bi'i Juan Marcos, tséajlenbi' légaquië', <sup>38</sup> pero biti' guyaza ládxë'ë Pablo ila'ché'ë-bi' tséajlenbi' légaquië' tu' bulá'alenbi' légaquië' luyú Panfilia, en bítirö yöjénlenbi' légaquië' dxin queë' Xanru'. <sup>39</sup> Biti' guca tuz xtídzá'gaquië' Bernabé, en Pablo ga bidxintë bulu'lá'alenë' tuë' ia'tué'. Bernabé guchë'ë-bi' bi'i Marcos, ate' gula'benë' tu lë'e barco, yójáquië' luyú Chipre. <sup>40</sup> Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'. <sup>41</sup> Gula'dödë' yugu' yödzö luyú Siria, en Cilicia, ate' bulu'tipë' ládxi'gaca bönachi queë' Cristo nacuá' ni'.

## 16

*Bi'i Timoteo runbi' tsözxön Pablo, en Silas*

<sup>1</sup> Gudödi ni' bila'dxinë' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' zxi'ininu tu nigula judío réajlë'ënu Cristo, pero xúzibi' biti' náquië' judío. <sup>2</sup> Yugu' böchi'ru' nacu'ë Listra,

en Iconio tunë' ba nalí queëbi', ta'nnë' runbi' le naca dxi'a. <sup>3</sup> Gú'unnë' Pablo tséajlenbi' bi'i ni lë', ate' gudélë'ë-bi', en guchúguië' lu xipëla'bi' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzo ni', tu' nöziguequinë' yúgu'të' xúzibi' biti' náquië' judío. <sup>4</sup> Cate' Pablo, en nupa dzágagaca lë' gula'dödë' gapa nacuá' yödzo ni', tu tu yödzo na' bulu'dödë' lu ná'agaquië' yugu' böchi'ru' nacu'ë gapa ni' yugu' xibá na' gulunë' gubáz nasöl-lë'ë Cristo, en bönni' gula tapa chi'ë bönachi queë', nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'. <sup>5</sup> Caní guca, bönachi yúgu'të' cö' bönachi queë' Cristo bila'dipa ládxi'gaca ca naca le réajlë'ëru' Cristo, ate' gula'yán tu tu dza.

*Tu bönni' Macedonia rulidzë' Pablo lu yëla bëchigal*

<sup>6</sup> Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinözgaquië', para cabí ilunë' libán que xtídzë'ë Xanru' luyú Asia. <sup>7</sup> Cate' bila'dxinë' luyú Misia, gulë'ënnë' tsöjáquië' luyú Bitinia, pero Dios Bö' Lá'ayi, Nu risöl-lë'ë Jesús queëru', biti' bëë légaquië' lataj. <sup>8</sup> Ní'irö gula'dödë' gala' ga dë Misia, ate' yöjáquië' lu yödzo Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'në' Pablo. <sup>9</sup> Lu yödzo ni' Dios buluí'inë' Pablo tu le bilé'enë' lu yëla bëchigal. Tu bönni' Macedonia buluí'i lahuë' lë', zuínë', en ráta'yuë' lahuë' Pablo, rnnë': "Gudödi ladztu', lu xiyú Macedonia, en gúcalen netu'." <sup>10</sup> Cate' bilé'enë' Pablo lë ni, lë na' buluí'i lahui lë', la' bë' ládxi'tëtu' tséajtu' luyú

Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

*Le gulunë' Pablo, en Silas lu yödzö Filipos*

<sup>11</sup> Ní'irö gurentu' lë'e barco, en buzá'atu' Troas. Gudöditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. <sup>12</sup> Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsólá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz quegaquië'. Lu yödzö nisö guzóatu' nababa dza. <sup>13</sup> Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Gurö'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. <sup>14</sup> Nútsa'nu ládjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzë náganu didza' ru'ë Pablo, ate' Xanru' gúcalenë'-nu para guzxí' lu ná'anu didza' na' bë'ë. <sup>15</sup> Ní'irö bidílanu lënu nisa, ate' gula'dila ca' nisa bönachi nacuá' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

<sup>16</sup> Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zí'dë'ë dumí yugu' bönni' xanbi'. <sup>17</sup> Bi'i nigula ni sudunóbi'-në' Pablo, en netu', ru'íbi' zidzaj didza', rnnabi':

—¡Yugu' bönni' ni tunë' xichinë' Dios nayëpisëtërë! ¡Tu'siyönnë' libí'ili' naca gaca uláli'!

<sup>18</sup> Caní benbi' zían dza. Cate' bíti'rö guyaza ládxë'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'isö burúajtë bö' na'.

<sup>19</sup> Cate' bila'lé'enë' xanbi' chiburúaj bö' na' run ga rinnë yá'abi', en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yé'ëyi. <sup>20</sup> Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácagaquië' judío, en tunë' ga tu'tsatsa bönachi yödzö ni. <sup>21</sup> Tu'sëdinë' le cabí ralla' si' lu ná'aru', en bití' ral-la' gunru', tu'nabábaru' Roma.

<sup>22</sup> Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácugaquië' Pablo, en Silas, ate' gula'guínë' légaquië' gubá'ayi. <sup>23</sup> Gudödi gula'guíndë'ë légaquië', gula'gu'ë légaquië' lidxi guíë. Gula'nná bé'enë' bönni' rusayjë' lidxi guíë na' gun chí'idë'ë légaquië'. <sup>24</sup> Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guíë na', en gulu'ë ní'agaquië' yeru yaga ta'zön ní'agaquië'.

<sup>25</sup> Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guíë na'. <sup>26</sup> Ní'irö tsárido'os gudödi budó' zxu' bach. Caní guca ga bidxintë guzxizi xilibi zö'ö lidxi guíë na',

ate' la' gula'yálgatë yúgu'të gapa nu riyaza, ate' bulu'huédxi ca' yugu' du guié nága'gaca bönni' nadzúngaquië' ni'. <sup>27</sup> Bubanë' bönni' na' rusayjë' lidxi guié. Cate' bilé'enë' nayálgagaca gapa nu riyaza lidxi guié na', gulecjë' guié tuchi' queë' para guti cuinë', tu' réquinë' chibulu'zxúnnajë' bönni' nadzúngaquië' lidxi guié na'. <sup>28</sup> Ní'irö Pablo zidzaj bulidzë' lë', gunné':

—¡Biti' bi gúni cuinu', tu' zóatu' ni yúgu'tëtu'!

<sup>29</sup> Ní'irö bönni' na' gunabë' guí', ate' gudá'atë' lu yu'u lidxi guié na'. Guzxízidë' lu yöl-la' radxi, ate' biyéchuë' xiní'agaquië' Pablo, en Silas. <sup>30</sup> Cate' chinubéajë' légaquië' lidxi guié na', gudxë' légaquië':

—Libi'ili', bönni', ¿bizxi ral-la' guna' para ulá'?

<sup>31</sup> Légaquië' të' lë':

—Guyéajlë'ë Xanru' Jesucristo, ate' uló' li', en lësca' caní ulu'lágaca bönachi nacua' lidxu'.

<sup>32</sup> Gulu'ilenë' lë' didza' ca naca xtídzë'ë Xanru', dzágagaca lë' yúgu'të bönachi nacua' lidxë'. <sup>33</sup> La' ná'asö, ni' naca chi'i dzó'ölö la' guchë'të' légaquië', ate' yöjtibë' légaquië' ga dxíagaquië' huë'. Gudödi ni', la' bidílatë' nisa, ate' gula'dila ca' nisa yúgu'të bönachi nacua' lidxë'. <sup>34</sup> Ní'irö guchë'ë légaquië' lidxë', en bë'ë le gulahuë'. Rudzéjanë' lë', en tu'dzeja ca' yúgu'të bönachi nacua' lidxë' tu' ta'yéajlë'ë Dios.

<sup>35</sup> Cate' za' rení' dza na', yugu' bönni' yúlahui' gula'söl-lë'ë ni'a ná'agaquië', ate' gulë' bönni' na' rusayjë' lidxi guié:

—Busán-gáquië' bönni' na'.

<sup>36</sup> Ní'irö bönni' na' rusayjē' lidxi guié gudíxjöi'inē Pablo didza' ni, gunnē':

—Gula'söl-lē'ē bönni' yúlahui' didza' usana' libí'ili'. Na'a, guli'rúaj, en buli'huőaj dxí'ado' ga rizóali'.

<sup>37</sup> Ní'irö birúajē' Pablo, en gudxē' yugu' ni'a ná'agaquiē' bönni' yúlahui' na', gunnē':

—Chigula'guiné' netu' lógaca bönachi sal-la' biti' narúguini queētu' ca rinná bē' xibá, en gula'gu'ē netu' lidxi guié, ate' netu' ni nabábatu' Roma. ¿Naru' tu'santsē' netu' bagáchi'sö? ¡Biti' ca' gaca! ¡Ilídigarē' légaquiē' udusángaquiē' netu'!

<sup>38</sup> Yöjhuőjgaquiē' ni'a ná'agaquiē' bönni' yúlahui' na', en bulu'siyönnē' yugu' bönni' yúlahui' didza' ni, ate' légaquiē' guládxinē' cate' bila'yönnē' nabábagaquiē' Pablo, en Silas Roma. <sup>39</sup> Cate' bila'dxinē' lidxi guié ni', guláta'yuē' lógaquiē' Pablo, en Silas cabí ulu'subáguē'ē légaquiē' xíguia'. Ní'irö gula'béajē' légaquiē' lidxi guié na', en guláta'yuē' lógaquiē' ulu'rúajē' yödzö na'.

<sup>40</sup> Ní'irö bila'rúajē' Pablo, en Silas lidxi guié na', ate' gula'yáziē' lídxinu Lidia. Cate' chibila'lé'enē' böchi'ru' nacu'ē ni', bulu'chíziē' didza' icja nágagaquiē', en la' bulu'zá'atē' ni'.

## 17

### *Yugu' bönachi Tesalónica tunē' dzatsa*

<sup>1</sup> Gula'dödē' Pablo, en Silas lu yödzö Anfípolis, en lu yödzö Apolonia, ate' bila'dxinē' lu yödzö Tesalónica, ga ni' zoa tu yu'u ga tu'dubē' bönni' judío, en tu'sädē' queē' Dios. <sup>2</sup> Bugá'anē' Pablo ni' idú galaj dza, ate' ca run cazē', guyijē' ga zoa yu'u



na' cate' naca dza lá'ayi quégaquië' bönni' judío, ate' bë'lenë' légaquië' didza'. <sup>3</sup> Buchila lá'anë', en bulu'inë' légaquië' rusëdi le nazúaj lu guichi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátië' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali'! ¡Bönni' ni náquië' Cristo!

<sup>4</sup> Ní'irö bal-lë' gula'yéajlë'ë Cristo, ate' gulunë' tsözxön Pablo, en Silas. Lësca' caní zían bönni' izá'a, bönni' ta'yéaj ládi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. <sup>5</sup> Ní'irö yugu' bönni' judío biti' ta'yéajlë'ë, lu yöl-la' ruzxé'e quégaquië' Pablo, bulu'tubë' yugu' bönni' biti' náca'gaquië' tsahui', bönni' ta'dasë' ca'. Cate' chibulu'tubë' bönachi zían, gulunë' ga gulún dzatsa idú lu yödzo na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. <sup>6</sup> Cate' biti' bulu'dzölinë' Pablo, en Silas, gula'béajë' Jasón, en ia'zica'rë' böchi'ru' nacu'ë ni', ate' gula'chë'ë légaquië' lógaquië' bönni' yúlalui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idútë yödzo'lió chibila'dxinë' ca' ni. <sup>7</sup> Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'túë' bönni' rinná bë'ë, lë' Jesús.”

<sup>8</sup> Cate' bila'yönnë' yugu' bönni' lu yödzo, en yugu' bönni' yúlalui' na' lë ni, gula'bö'ë böniga. <sup>9</sup> Ní'irö, gudödi gula'zi'ë bönni' yúlalui' dumí le bulu'cá'anagarë' Jasón, en ia'zica'rë' bönni' na', bulu'sanë' légaquië'.

*Le gulunë' Pablo, en Silas lu yödzö Berea*

<sup>10</sup> Ní'irö yugu' böchi'ru' ni' la' gula'söl-la'të Pablo, en Silas, ni' naca chi'i dzö'ölö, ate' söjáquië yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios. <sup>11</sup> Gulácarë' tsahui' bönni' ni ca bönni' nacu'ë Tesalónica, tu' gula'zí' lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquiube'enë' channö nácatë lé na'rnnë' Pablo. <sup>12</sup> Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. <sup>13</sup> Ní'irö cate' guléquiube'enë' bönni' judío nacu'ë Tesalónica, lësca' rigu'íxjö'ë Pablo xtídzë'ë Dios lu yödzö Berea, yöjáquië' ni', en gulunë' ca' ni' ga gulún dzatsa bönachi zían. <sup>14</sup> Ní'irö yugu' böchi'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzö Berea. <sup>15</sup> Yugu' bönni' Berea na' gula'chë'ë Pablo lu yödzö Atenas. Ní'irö la' yöjhuójpgacatë' lu yödzö Berea, tu'ú'ë xtídzë'ë Pablo, para ilé' Silas, en bi'i Timoteo, tsójacatë' ga ni' zoë' Pablo.

*Le benë' Pablo lu yödzö Atenas*

<sup>16</sup> Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhu'í'ini ládxi'ë tu' rilé'enë' ta'yéaj ládxi'gaca yúgu'të bönachi yödzö na' yugu' budó' guiöj budó' yaga. <sup>17</sup> Que lé ni na' bé'lenë' bönni' judío, en bönni' ta'yéaj ládxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yé'ëyi didza' ca naca xtídzë'ë Cristo. <sup>18</sup> Bal-lë' bönni' dá'gaquië'

le tu'sédinë' bönni' epicúreo, en le tu'sédinë' bönni' estoico gulu'ilenë' Pablo didza'. Bal-lë' gula'nnë':

—¿Bizxi rë'ënitsenë' innë' bönni' huë' didza' ni?  
Ia'bal-lë' gula'nnë':

—Réqitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán.  
<sup>19</sup> Ní'irö gula'guélé'ë në'ë Pablo, en gula'ché'ë lë' lu guí'a ga tu'dubë' tu'ë didza', nazi'i le Areópago, ta'nnë':

—¿Naru' huácatsö yönnitu' didza' cubi ni rusiyönnu' netu'? <sup>20</sup> Rusiyönnu' netu' le tun ga rubánitu'. Ré'ënnitu' inözitu' bizxi rnna didza' ni ru'u.

<sup>21</sup> Bítirö ta'yaza ládxi'gaquië' ilunë' bönni' Atenas na', en bönni' izá'a nacu'ë ni', pero ila'yönnisinë', en ilu'isë' didza' tu le cubi.

<sup>22</sup> Ní'irö guzuínë' Pablo gatsaj láhui'lö lö'a Areópago na', gunné':

—Bönni' Atenas, yúgu'të le rilé'eda' naca bë' reaj ládxi'da'ali' yugu' dios queéli'. <sup>23</sup> Cate' gudöda' lu yödzö, en buyúgaca' yugu' le reaj ládxi'li', yöjxáca'a ca' tu nichu ga ni' nazúaj le rnna caní: “Tu Dios, Cuntu Nu Nunbë' Lë'.” Dios na' reaj ládxi'li'-në' sal-la' biti' núnbë'ëli'-në', Dios ni runa' libán queë' loli'.

<sup>24</sup> ¡Dios ni benë' yödzölió, en yúgu'të le nacuá' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi!

<sup>25</sup> Biti' bi riyadzaj queë' le gaca ulu'nödzaj bönachi, tu' runödzjë' Lë' cazë' quégaca yúgu'të bönachi yöl-la' na'bán, en yúgu'të le riquíniru'.

<sup>26</sup> 'Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e

dza ila'cuá', en gapa ral-la' ila'cuá'. <sup>27</sup> Dios bucu'ë légaquië' para ulu'guiljé' Lë', channö nácati'tës ila'dzölinë' Lë' sal-la' ila'gán ila'zönsë'. Caní raca sal-la' bití' zoë' zi'tu' ga zóaru' tu turu'. <sup>28</sup> Lë cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gaquië' libí'ili', nupa bulu'zúaj le do' rúl-lali', le ta'nná: "Di'a dza queë' Dios nácaru'." <sup>29</sup> Na'a, channö nácaru' di'a dza queë' Dios, bití' ral-la' innaru' náquië' Dios ca tu budó' guiöj budó' yaga, o tu le néquini oro, o plata, o guiöj, le núngaca bönachi ca naca tu le ta'guínnajsö ícjaguequi. <sup>30</sup> Dios budödë' cá'asö yugu' le gulunë' lu yöl-la' bití' réajni'i quégaquië' yugu' iz chigula'dödi, pero na'a rinná bé'enë' yúgu'të bönachi idútë yödzölió ulu'bí'i ládxi'gaca. <sup>31</sup> Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

<sup>32</sup> Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjé' bal-lë', ate' ia'bal-lë' gula'nnë':

—Yöniguetu' ia'tú lë ni ru'u didza' que.

<sup>33</sup> Ní'irö burúajé' Pablo gatsaj láhui'lö ga na' nacu'ë, söhuöjé'. <sup>34</sup> Bal-lë' gula'yéajlë'ë Cristo, en gulunë' tsözxón Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

### *Le benë' Pablo lu yödzö Corinto*

<sup>1</sup> Gudödi guca lë ni, buzë'ë Pablo yödzö Atenas na', ate' gуйijë' yödzö Corinto. <sup>2</sup> Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzö Roma. Guyijë' Pablo ga nacu'ë Aquilo, en Priscila na' <sup>3</sup> tu' naca tuz dxin tunë' Aquilo, en Pablo. Bugá'analenë' légaquië', ate' tsözxön gulunë' dxin, tunë' yugu' yu'u guídido'. <sup>4</sup> Cate' náacagaca dza lá'ayi quégaquië' bönni' judío, razië' Pablo lu yu'u ga tu'dubë' tu'sëdë' queë' Dios, ga ni' bë'lenë' légaquië' didza'. Gú'unnë' ulu'inë' yugu' bönni' judío, en yugu' bönni' izá'a nacu'ë ni', naca idútë li le riguixjö'ë ca naca queë' Jesucristo.

<sup>5</sup> Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

<sup>6</sup> Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, ní'irö Pablo gudxibë' lari' nácuë' para ulu'inë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queë'li', calëga neda' nabága'a le. Na'a, uyija' ga nacua' bönachi izá'a.

<sup>7</sup> Ní'irö burúajë' Pablo ni', en gуйijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios. <sup>8</sup> Crispo, bönni' lo que yu'u ga na'

tu'dubë' tu'sedë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacuá' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. <sup>9</sup> Ní'irö Lë cazë' Xanru' gudxë' Pablo lu yëla bëchigal, gunnë':

—Biti' gádxinu', en biti' su' dxisö, quíxjö'u xtídza'a, <sup>10</sup>tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiquequi quia' bönachi zían lu yödzö ni.

<sup>11</sup> Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

<sup>12</sup> Cate' bidxín dza rinná bë'ë Galión luyú Acaya, guláquië' tuz bönni' judío bití' ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi'a rusöröë' Galión na'. <sup>13</sup> Gulë' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queëtu'.

<sup>14</sup> Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzé naga' xtídza'li' ca ral-la' guna', <sup>15</sup>pero channö naca didza' bizxaj que dídza'sö, o que lágaca bönachi, en ca naca xibá queézili', guli'cá'ana tsahui' libí'isili', tu' cabí' rë'ënda' neda' gaca' nu uchi'a usörö yugu' le caní.

<sup>16</sup> Ní'irö Galión bulágui'ë légaquië' lu yu'u yúlahui'. <sup>17</sup> Ní'irö yúgu'të bönni' uládz na' gula'guélé'ë Sóstenes, bönni' lo que yu'u ga tu'dubë' bönni' judío, en tu'sedë' queë' Dios, ate' gula'guinë' lë' lö'a yúlahui', pero bití' bë' ládxe'ë Galión lë' na' raca.

18 Pablo bugá'anë' lu yödzö na' zían dza, ate' gudödi busiyönnë' böchi'ru' nacu'ë ni' didza', guyijë' yödzö Cencrea, ga ni' benë' yútusö icjë', tu' dë tu le nazi' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo. 19 Cate' bila'dxinë' yödzö Éfeso, Pablo bulá'alenë' légaquië' ni'. Guyázië' lu yu'u ga tu'dubë' bönni' judío, en tu'sedë' queë' Dios, ate' bé'lenë' nupa nacua' ni' didza'. 20 Yugu' bönni' ni' guláta'yüë' lahuë' Pablo ugá'analënë' légaquië' ia'lati' xidzé, pero lë' biti' gú'unnë'. 21 Bé'lenë' légaquië' didza', gunné':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö guë'ennë' Dios.

Ní'irö gurenë' Pablo tu lë'e barco, en buzë'ë Éfeso na'.

*Ridxinë' Pablo Antioquía, ate' risí lahuë' röjenë' libán le bunni luzuí*

22 Gudödi bidxinë' Pablo yödzö Cesarea, gurenë' guyijë' Jerusalén, ga ni' yöjyüë' bönachi queë' Cristo, ate' ní'irö buzë'ë ni', en guyijë' Antioquía. 23 Gudödi zoë' ni' nababa dza, buzë'ë ni', sa'yéajë' tu tu yödzö luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

*Runë' libán Apolos lu yödzö Éfeso*

24 Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandro, en nabé'ede'enë' ru'ë didza', en nazëdadë'ë le nazúaj lu guichi lá'ayi. 25 Chinazëdë' bönni' ni ca naca le réajlë'ëru' Xanru'. Idú lãdxë'ë bë'ë didza', en ca nácatë busëdinë' bönachi ca

naca queë' Jesús, sal-la' núnbë'ë tuz le ruquíla bönachi nisa ca benë' Juan. <sup>26</sup> Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila'yönnë' didza' ru'ë Apolos na', gula'chë'ë lë' quez, en bulu'zëajni'irönë' lë' xibá queë' Dios. <sup>27</sup> Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zí'dë'ë xibé didza' ru'ë Apolos na', tu' ruzá' ládxë'ë Dios quégaquië'. <sup>28</sup> Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

## 19

### *Le benë' Pablo lu yödzö Éfeso*

<sup>1</sup> Tsanni ni' zoë' Apolos lu yödzö Corinto, gudödë' Pablo gapa nacuá' yödzö ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'.

<sup>2</sup> Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayönitu' channö zoë' Dios Bö' Lá'ayi.

<sup>3</sup> Ní'irö Pablo gunábinë' légaquië', rnnë':

—¿Nacxi guca le bidí'lali' nisa?

Ta'nnë':

—Ca buquílë' Juan bönachi nisa.

<sup>4</sup> Pablo gunné':



—Buquílë’ Juan bönachi nisa, nupa ni’ bulu’bí’i ládxi’guequi, ate’ Juan caz gudxë’ léguequi ral-la’ ila’yéajlë’ Bönni’ na’ si’ zá’tëlë’ ca lë’, ate’ Bönni’ ni naquië’ Jesús, Lë’ Cristo.

<sup>5</sup> Cate’ yugu’ bönni’ na’ bila’yönnë’ didza’ ni ru’ë Pablo, bila’dilë’ nisa tu’ chita’yéajlë’ë Xanru’ Jesús. <sup>6</sup> Cate’ guxóa në’ë Pablo légaquië’, en ni’ rulidzë’ Dios, bidisóalenë’ Dios Bö’ Lá’ayi légaquië’, ate’ gulu’ë didza’ yúbölö, en gulu’ë didza’ uláz queë’ Dios. <sup>7</sup> Guláquië’ bönni’ ni idú chínnuë’.

<sup>8</sup> Guzöë’ Pablo idú ca tsonna beo’ ni’, ate’ guyázië’ lu yu’u ga tu’dubë’ bönni’ judío, en tu’sedë’ queë’ Dios, ate’ lu yöl-la’ rugu ladxi’ benë’ libán lógaquië’. Bë’lenë’ légaquië’ didza’, en gú’unnë’ ulu’inë’ légaquië’ nácatë le rigu’íxjö’ë ca rinná bë’ë Dios. <sup>9</sup> Ní’irö bizídi icja ládxi’do’gaquië’ bal-lë’, en biti’ gula’yéajlë’ë Cristo, ate’ gula’nnë’ zi’ë que xtídzë’ë Xanru’ ga nacuá’ bönachi zían na’. Ní’irö Pablo bulá’alenë’ légaquië’, ate’ bubéajë’ quez nupa ta’yéajlë’ Cristo. Bë’lenë’ bönachi ni ta’yéajlë’ Cristo didza’ yugu’ dza ga na’ tu’dubë’ lu yu’u ga rusédinë’ Tiranno bönachi. <sup>10</sup> Caní béntica’së’ Pablo idú ca chopá iz, ate’ caní guca, bila’yöni yúgu’të bönachi didza’ ca naca queë’ Xanru’ Jesús, bönachi nacu’ë yugu’ yödzö luyú Asia, bönachi judío, en bönachi izá’a. <sup>11</sup> Dios benë’ yugu’ yöl-la’ huáca zxön lu në’ë Pablo. <sup>12</sup> Caní guca, bal-lë’ bönni’ gula’zi’ë yugu’ lári’do’ béguë’ë icjë’ Pablo, en yugu’ lari’ tsölá’a bugalë’ lë’ë, ate’ yöjuá’gaquië’ léguequi gapa nacuá’ nupa te’e, ate’ bulu’huöáquië’ ca naca yödzöhuë’ que queégaquië’, en bulu’rúaj bö’ xihui’ yú’ugaca bönachi na’.

13 Ní'irö bal-lë' bönni' judío udá dzaga tu'béajë bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ni'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

14 Caní gulunë' gadxi bönni' xzí'inë' Esceva, tu bönni' judío náquië' bönni' lo ládjagaquië' bixúz unná bé'. 15 Bubí'i didza' bö' xihui' na', gunná:

—Núnbë'a-në' Jesús, en núnbë'eda' bönni' lë' Pablo, pero libí'ili', ¿núxxitë libí'ili'?

16 Ní'irö guxíti'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guxzéqui'rönë' ca légaquië'. Caní guca, xiguídigacasë', en huë'gacatëzë' bulu'zxúnnajë' gadxë' bönni' na' lu yu'u ni'. 17 Guzé didza' ca guca lë ni, ate' bila'yöni yúgu'të nupa nacuá' lu yödzö Éfeso, bönachi judío, en bönachi izá'a, ate' yúgu'të' guládxinë' Dios. Que lë ni na' gulunë' zxön Lë' Xanru' Jesús.

18 Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjö'ë le chigulunë'. 19 Lësca' caní gulunë' zían bönni', zí'alö gulunë' yöl-la' udzá'. Dujúa'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të bönachi. Bulu'labë' tsca nazáca'gaca guichi na', le guca idú chi un mil dumí plata. 20 Caní guca, guzëda' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

21 Gudödi gulaca lë ni, benë' queë' Pablo tsejë' Jerusalén, pero zí'alö ral-la' tödë' yugu' yödzö luyú

Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

<sup>22</sup> Ní'irö gusöl-lë'ë-bi' chópabi' bi'i bönni' tácalenbi' lë', légacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

*Tu'tsatsa bönachi lu yödzo Éfeso*

<sup>23</sup> Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'. <sup>24</sup> Benë' Demetrio, bönni' gubëdxi guië plata ga bulu'tsatsë'. Run cazë' yugu' lidxi budó' guiöj budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach. <sup>25</sup> Butubë' Demetrio na' ia'zíca'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'. <sup>26</sup> Rilé'eli', en riyönili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': “Yúgu le núngaca bönachi biti' nácgaca dios.” <sup>27</sup> Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládxi'gaca-nu bönachi idútë luyú Asia, enca' idútë yödzölió.

<sup>28</sup> Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatërönu zxön Diana, dios queëru' rë'u, bönachi Éfeso.

<sup>29</sup> Caní guca, bulu'tsatsa bönachi idútë lu yödzo na', ate' guláquië' tuz, en carelö yöjáquië' lö'a

yúlahui'. Gulá'ayöjê' Gayo, en Aristarco, bönni' Macedonia túngaquiê' Pablo tsözxön, ga ni'. <sup>30</sup> Cate' gú'unnê' Pablo tsáziê' ga nacuá' bönachi zián na', bití' ca' gulu'ë lè' lataj bönni' ta'yéajlè'ë Cristo. <sup>31</sup> Lësca' caní gulunê' bal-lè' bönni' yúlahui' que luyú Asia, bönni' ta'lé'enê' Pablo dxi'a. Gula'söl-lè'ë queê' nupa gulá'tayu lahuê' bití' tsaziê' lö'a yúlahui' na'. <sup>32</sup> Ga ni' tu'tsatsê', en ta'bödxi'ë, tu le ta'nnê' bal-lè', en ia'tú le ta'nnê' ia'zica'rê', tu' rő'ögacasê' baröli bönni' zián na' tu'tsatsê', en lá'tu'biqui' yúgu'tëgaquiê' bití' nözguequinê' bizx que na' nudúbigaquiê' ni'. <sup>33</sup> Ní'irö yugu' bönni' judío gula'béajê' Alejandro ladaj bönachi zián na', ate' bulu'dxiguê'ë lè' lógaca bönachi zián na'. Bulu'e Alejandro na' len nê'ë para ila'bö' dxisö, tu' gú'unnê' gu'ë didza' le gácalen yugu' bönni' judío na' lógaca yúgu'tëguequi. <sup>34</sup> Cate' guléquite'enê' náquiê' judío, yúgu'tê' gulu'ë tsözxön zidzaj didza' idú ca chopa hora, ta'nnê':

—¡Nácatërönu zxön Diana, dios queêru' rë'u bönachi Éfeso!

<sup>35</sup> Ní'irö bönni' uzúaj que yúlahui' benê' ga gula'bö' dxisö bönachi zián na', gunnê':

—Bönni' Éfeso, nözigaca yúgu'tê bönachi zoa yudo' queênu Diana, dios zxön, ni. Rë'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúzxiba. <sup>36</sup> Cuntu nu gaca tá'baga' lè ni. Que lè ni na' run bayudxi sóali' dxisö, en bití' bi gúntézili'. <sup>37</sup> Naché'gacali'-nê' bönni' ni, en bití' ta'banê' le dzö'ö yudo', en bití' ta'nnê' xihuê'ë queênu dios queéli'. <sup>38</sup> Que lè ni na', channö zoa didza' bizxaj quégaquiê' Demetrio, en

yugu' bönni' gubëdxi guié plata nacua'lenë' lë', len nütitës bönni', dë lataj ga nu uzë nagui légaquië', en zoa nu uchi'a usörö légaquië'. Ni' huáca ulu'zegui luzá'agaquië' didza' tuë' ia'túë'. <sup>39</sup> Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'. <sup>40</sup> Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

<sup>41</sup> Cate' budxi bë'ë didza' ni, busöl-lë'ë bönachi zian na' nudúbigaca ni' tsöhuöjgaca lídxiguequi.

## 20

### *Sa'yéajë' Pablo luyú Macedonia, en luyú Grecia*

<sup>1</sup> Cate' gurö'ö dxi dzatsa na' guca lu yödzö Éfeso, bulidzë' Pablo yugu' bönni' ta'yéajlë'ë Cristo, ate' guchizië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia. <sup>2</sup> Gudödë' yugu' yödzö luyú ni', ruzéajni'ide'enë' böchi'ru' nacu'ë ni', ate' gudödi ni' bidxinë' luyú Acaya. <sup>3</sup> Guzöë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bö' nisië' bönni' judío lë' para ila'zönë' lë'. Que lë ni na' buguelë'ë nöza söhuöjë' luyú Macedonia, ate' bidxinë' yödzö Filipos. <sup>4</sup> Sópater, zxi'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenë' tsözxön lë'. <sup>5</sup> Ní'irö yugu' bönni' ni yöjnörugaquië' lahuë' Pablo, yöjáquië' yödzö Troas, ga ni' gula'bözë' lë'. <sup>6</sup> Lu yödzö Filipos na',

neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'í cúa zi que, gurentu' tu lë'e barco, en buzá'atu' Filipos na'. Gudödi gayu' dza budzá'gatu' bönni' ni' yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

### *Le benë' Pablo lu yödzo Troas*

<sup>7</sup> Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá' ládxi'ru' ca gútië' Jesucristo. Ni' rusëdinë' Pablo légaquië', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë gudödi guluhuëla. <sup>8</sup> Ga ni' nudúbigaquië' naca lu yu'u xitsá', ate' nacuá' zían le ta'gú'u bení' ga na'. <sup>9</sup> Zóabi' bi'i Eutico ni', rő'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rő'öbi' rásibi' bi'i na' naca ga bunni cuía lu yu'u, ate' rásisibi' ca' gubíxitëbi', böxjabi' ga bidxintëbi' znan yu'u. Nátitëbi' bulu'lisë'-bi'. <sup>10</sup> Bötjë' Pablo znan yu'u na', ate' yöjxóë' lëbi', en bunidë'-bi'. Ní'irö gudxë' nupa nacuá' ni':

—Biti' gadxi idzöbili'. Nabanbi'.

<sup>11</sup> Cate' chibubenë' Pablo xitsá', gudélë'ë yöta xtila, gudahuë'. Ní'irö Pablo bë'lenë' légaquië' didza' ga bidxintë zila balö. Gudödi ni' burúajë' ni'. <sup>12</sup> Bi'i bönni' ra'bán na' gubíxibi', bulu'chë'ë-bi' nabanbi', en bulu'zí' zxöndë'ë.

### *Ca guca bidxintu' Mileto*

<sup>13</sup> Gunörutu' lahuë' Pablo, en yöjchentu' tu lë'e barco, ate' gudöditu' ga bidxintu' yödzo Asón para tsöjtsá'gatu'-në' Pablo ni', para gaca ca na' chibén xtí'í'za'tu', tu' gú'unnë' Pablo tsejë' ni' së'esi

ni'ë. <sup>14</sup> Cate' chibudzágatu'-në' lu yödzö Asón na', gurénlenë' netu' lë'e barco, ate' guyéajtu' yödzö Mitilene. <sup>15</sup> Buzá' barco ni', ate' dza buropi bidxintu' tōdi li ga zoa luyú bidxi nazí'i le Quío, ate' ia'tú dza ca' gudōditu' tōdi li ga dë yödzö Samos, en bidxintu' yödzö Trogilio ga ni' guzóatu' tu chi'i. Ia'tú dza ca' bidxintu' yödzö Mileto. <sup>16</sup> Caní bentu' tu' chibenë' queë' Pablo tōdisë' yödzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

*Didza' bë'ë Pablo lu yödzö Mileto*

<sup>17</sup> Cate' ni' zoë' Pablo lu yödzö Mileto, gusöl-lë'ë nu yöjlidza bönni' gula tapa chi'ë bönachi queë' Cristo nacu'ë Éfeso. <sup>18</sup> Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia. <sup>19</sup> Yugu' dza bena' xichinë' Xanru' lu yöl-la' nöxaj ladxi', ga bidxintë gurōdxa' ni'a queë'li', ate' zían le guca quia' le guzxí' bë' neda' ni'a que le ruá' dō' gulunë' quia' bönachi judío biti' ta'yéajlë' Cristo. <sup>20</sup> Béntica'sa' libán ga zóali' que yúgu'të le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'. <sup>21</sup> Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queë' Dios, en ila'yéajlë' Xanru' Jesucristo. <sup>22</sup> Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'. <sup>23</sup> Yúgu'të yödzö ga ridá', riguíxjöi'inë' Dios Bö' Lá'ayi neda', rë' neda' ila'gu'ë neda' lidxi guíë bönni' judío biti' ta'yéajlë', en ulu'saca' zi'ë neda'. <sup>24</sup> Biti' bi runi neda' que lë na' gaca, sal-la' gátia'

o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxe'ë Dios queëru'. Caní guna' len yöl-la' rudzeja.

<sup>25</sup> 'Na'a, yúgu'tëli' na' chibena' libán loli' ca rinná bë'ë Dios, nözda' bíti'rö ulé'eli' neda'. <sup>26</sup> Que lë ni na', le nácatë rea' libí'ili' na'a dza. Biti' nabága'a neda' queëli' nituli' libí'ili'. <sup>27</sup> Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios. <sup>28</sup> Que lë ni na', guli'gún chi'i cuinli', en guli'gún chi'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'. <sup>29</sup> Chinözda', tödi uzá'a ga zóali', ila'yaza nupa ilë'ëni ulu'suniti bönachi queë' Cristo ga zóali', ilunë' ca tunba' bö'cu' guí'a sínia', tu'sunitiba' yugu' bö'cu' zxila'. <sup>30</sup> Ila'rúajë' bönni' nútsa'gaquië' ládjali', ate' ilu'ë didza' bití' nácatë para ulu'béajë' quégacasë' nupa ta'yéajlë' Cristo nútsa'gaca ládjali'. <sup>31</sup> Que lë ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en të dza buchízia' icja nágali' tu tuli' ga bidxintë gurödxá' queëli'.

<sup>32</sup> 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ládxe'ë queëli', en gunë' ca rna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxön yugu' bönni' rö queë'. <sup>33</sup> Catu caz guzé ládxa'a le nequi quégaquië' böchi' luzá'a. Biti' guzé ládxa'a dumí, o lari' quégaquië'. <sup>34</sup> Nöz quézili' dxi'a, len na'a caza' bena' dxin para



gaca gá'ua' le biyadzaj quia', en quégaca nupa gula'cuá'len neda'. <sup>35</sup> Ca naca yúgu'tè le bena', bulu'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Uzí'irö xibé nu bi runödzej ca nu bi rizi'."

<sup>36</sup> Cate' budxi bë'ë Pablo didza' ni, buzóa zx-ibë', ate' benë' tsözxön yúgu'tè', bulu'lidzé' Dios. <sup>37</sup> Ní'irö gula'bödxë' yúgu'tè'. Bulu'nidë' yenë' Pablo, en bulu'tsaga lahuë' lë'. <sup>38</sup> Caní gulunë' tu' bulu'hu'innë' ni'a que didza' na' bë'ë Pablo, gunné': "Bíti'rö ulé'eli' neda'." Yöjácalenë' tsözxön lë' ga na' gurenë' lu barco.

## 21

### *Sa'yéajë' Pablo Jerusalén*

<sup>1</sup> Gudödi bulá'alentu' légaquië', guyú'utë nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara. <sup>2</sup> Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nöza. <sup>3</sup> Gudöditu' ga nalá' Chipre, le guta' tsölá'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjca'ana yua' ni' le dzö'ö lë'e barco na'. <sup>4</sup> Lu yödzö Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' böchi'ru' ni' idú gadxi dza. Tu' chibulu'innë' Dios Bö' Lá'ayi légaquië' le ral-la' gaca queë' Pablo, gulë' lë' biti' tsejë' Jerusalén. <sup>5</sup> Cate' chibizá'a dza na', burúajtu' ni', ate' gula'zá'lenë' netu' tsözxön yúgu'tè' len nigula que queëgaquië', en yugu' bi'i

quégaquië', ga bidxíntëtu' ní'ilö ra' yödzo na'. Ra' nísado' ni' buzóa zxíbitu', en bulidztu'-në' Dios. <sup>6</sup> Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuöjgaquië' lídxigaquië'.

<sup>7</sup> Buzá'atë barco na' lu yödzo Tiro, ate' ga yöjsé bidxín lu yödzo Tolemaida. Burúajtu' lë'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza. <sup>8</sup> Cate' za' rení' ia'tú dza, burúajë' Pablo ni', ate' dzá'gatu'-në' netu' guyéajtu' yödzo Cesarea. Ni' guyú'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítse'ë gadxë' bönni' ni' bulu'cu'ë dza ni'te para ilácalenë' bönachi queë' Cristo. <sup>9</sup> Nacuá'abi' tapa bi'i nigula ra'bán queë' Felipe na', tu'ibi' didza' uláz queë' Dios. <sup>10</sup> Gudödi gudzetu' chopa tsonna dza ni', ní'rö bidxinë' Agabo ni', bönni' ru'ë didza' uláz queë' Dios, narúajë' luyú Judea. <sup>11</sup> Bönni' ni buduyüë' netu', ate' gudélë'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a.”

<sup>12</sup> Cate' biyönitu' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén. <sup>13</sup> Bubi'ë didza' Pablo, gunné':

—¿Bizxi ni runli', ribödxili', en rusuhu'inili' neda'? Neda' chizóa caza' sina', calégasö ilúguië' neda', pero gátia' ca' lu yödzo Jerusalén ni'a queë' Xanru' Jesús.

<sup>14</sup> Tu' cabí guzxéqui'tu'-në' didza', bíti'rö bi gúdxitu'-në', ate' gunnatu':

—Gaca ca raza ládxe'ë Xanru'.

<sup>15</sup> Cate' chigula'dödi dza na', bupa'atu' queëtu', ate' guyéajtu' Jerusalén. <sup>16</sup> Gula'zá'lenë' netu' bal-lë' bönni' ta'yéajlë'ë Cristo, nacu'ë Cesarea, ate' dzáguië' Mnasón, tu bönni' Chipre, légaquië'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

### *Pablo röjyüë' Jacobo*

<sup>17</sup> Cate' bidxintu' Jerusalén, len yöl-la' rudzeja quégaquië' böchi'ru' ni' ta'yéajlë'ë Cristo gulunë' netu' bal. <sup>18</sup> Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chi'ë bönachi queë' Cristo nacu'ë Jerusalén. <sup>19</sup> Cate' Pablo chibugapë' légaquië' Dios, busiyönnë' légaquië' yúgu'të le benë' Dios lu në'ë lë' ga nacuá' bönachi izá'a. <sup>20</sup> Cate' bila'yönnë' lë ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të' túndë'ë bal xibá queë' Moisés. <sup>21</sup> Chibila'yönnë' yugu' le tu'i didza' bönachi le ta'nnë' quiu', ta'nná rigú'u yöl-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquië' biti' ila'chúguië' lu xpëla'gacabi' bi'i bönni'do' quégaquië', en biti' ilunë' bal yugu' le nalëbiru' runru' rë'u, bönachi judío. <sup>22</sup> ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni. <sup>23</sup> Na'a, ben lë ni rëtu' li'. Nacuá'lenë' netu' ni tapë' bönni', chinazí' lu ná'agaquië' lahuë' Dios tu le ilunë'. <sup>24</sup> Guchë'ë yugu' bönni' ni, en ben légaquië' tsözxön gun dxi'a

cuinli' ca naca que yudo', en gudizxaj li' le ral-la' ila'guizxjē' para ilún yútusö ícjagaquiē'. Ní'irö ila'nözinē' yúgu'tē bönni' judío biti' nácatē lē na' ta'nnē' quiu', pero lēasca' li' runu' le naca dxi'a, en runu' ca rinná bē' xibá queē' Moisés. <sup>25</sup> Ca naca quégaca bönachi izá'a, nupa ni' chita'yéajlē' Cristo, chibén xtídza'tu', en buzúajtu' lu guichi ca ral-la' ilunē'. Biti' run bayudxi ilún chi'ē yugu' lē ni tunē' bönni' judío, pero tuz:

Biti' ilahuē' le ta'gú'u bönachi lógaca budó' guiöj budó' yaga.

Biti' ilahuē' rön.

Biti' ilahuē' xipéla'gacaba' böa' guixi' biti' narúaj-gácaba' rön.

Biti' ilunē' le ruá' dö'.

### *Ta'zönē' Pablo lö'a yudo'*

<sup>26</sup> Ní'irö Pablo guchē'ē queē' tapē' bönni' na', ate' dza buropi ni' ben dxi'a cuinē' tsözxön len légaquiē' ca naca que yudo'. Ní'irö guyáziē' lö'a yudo', para gaca bē' bizxi dza údxi ilunē' le tu'ún dxi'a cuíngaquiē', dza ni' ral-la' tsöjuá'agaquiē' le ila'gu'ē lahuē' Dios que queégaquiē'. <sup>27</sup> Cate' chizóa izá'a gadxi dza na', bal-lē' judío narúajgaquiē' luyú Asia bila'lé'enē' Pablo, zoē' lö'a yudo'. Gulunē' ga gulún dzatsa bönachi zían, ate' gula'zönē' Pablo. <sup>28</sup> Gulu'ē zidzaj didza', ta'nnē':

—¡Guli'gácalen netu', bönni' Israel! Bönni' ni rusédinē' yúgu'tē bönachi yúgu'tē lataj ulu'cá'ana cá'asö yödzo queēru', en xibá queē' Moisés, en yudo' queēru' ni. Na'a, chigulu'ē yugu' bönni' izá'a lu yudo' ni. Caní runē', run dítjanē' lataj lá'ayi ni.

29 Caní gula'nnē' tu' bila'lé'enē' Pablo zí'alò lu yödzo dzáguie' Trófimo, bönni' Éfeso, en téquinē' gulu'ē bönni' ni lu yudo'.

30 Caní guca, bulu'dubi yúgu'tē bönachi yödzo, ate' bila'guirē' ni'. Ní'irö gula'zönē' Pablo, en gulá'ayöjē' lē', bulu'béajē' lē' lö'a yudo', ate' la' bulu'sáyjatē' ga nu riyaza lö'a yudo' na'. 31 Cate' chitequi quézine' ilútiē' Pablo, bidxín didza' lahuē' bönni' lo rinná bé'enē' bönni' röjáquiē' gudil-la. Biyönnē' tun dzatsa yúgu'tē bönachi Jerusalén. 32 Bönni' lo ni la' butúbitē' bönni' röjáquiē' gudil-la, len bönni' ta'nná bé'enē' légaquiē', ate' carelö guyéajlenē' légaquiē' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enē' bönni' röjáquiē' gudil-la, en bönni' na' röjáquiē' gudil-la, bulu'sané' ta'guiné' Pablo. 33 Ní'irö gubíguie' bönni' lo na', en guzxönē' Pablo, ate' gunná bé'enē' bönni' röjáquiē' gudil-la ilúguie' lē' len chopa du guie'. Gudödi ni' gunábinē' bönachi zían ni', rnnē':

—¿Nuzxi caz bönni' ni, en bizxi benē'?

34 Ta'bödxi'a bönachi zían na', que queégaca ca ta'nná. Caní guca, bití' bi guca tséajni'inē' bönni' lo na', tu' tu'tsatsa bönachi na', ate' gunná bé'enē' bönni' röjáquiē' gudil-la ila'ché'ē Pablo lu yu'u zxön ga nagá'anagaquiē' bönni' na' röjáquiē' gudil-la. 35 Cate' bila'dxinē' ga naca ni'yēpi' que yu'u zxön na', bönni' na' röjáquiē' gudil-la gulu'inē' Pablo, tu' dxíadi'igaca bönachi zían légaquiē', 36 en zá'gaca cúdzu'lögaquiē', ta'bödxi'a, ta'nná:

—Guli'gútiē'.

*Didza' bē'ē Pablo uláz que' lógaca bönachi*

<sup>37</sup> Cate' ni' gula'sí lógaquië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' röjáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatsö' didza' griego? <sup>38</sup> ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

<sup>39</sup> Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzo lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

<sup>40</sup> Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zían ni'. Cate' chigula'cu'ë dxisö, Pablo bë'lenë' légaquië' didza' lu didza' hebreo.

## 22

<sup>1</sup> Caní gunné' Pablo:

—Libí'ili', bönni' gula, en libí'ili' böcha'a. Buli'zë nágali' le guía' libí'ili' ca naca le runa'.

<sup>2</sup> Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

<sup>3</sup> —Naca caza' neda' bönni' judío. Gulja' lu yödzo Tarso luyú Cilicia, pero guzxöna' lu yödzo ni, ate' busédinë' Gamaliel neda' idú ca naca xibá quégaquië' xuz xtó'oru'. Bë'tica'sö ládxa'a guyéaj ládxa'a Dios ca runli' libí'ili' na'a. <sup>4</sup> Zí'alö gudxia ládxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátië'. Guzxöngaca'-në', en gulú'ugaca'-në' lidxi guié, yugu' bönni', en nigula. <sup>5</sup> Lësca' huáca ilunë' ba nalí yugu' bixúz

unná bē', en yugu' bönni' gula tu'zėjai'nē' que le gulunē'. Gulunē' guichi unná bē' le yōju'a ga nacu'ē böchi'ru' judío lu yōdzō Damasco. Guyija' ni' para tsōjxōngaca' nupa ni' ta'yéajlē' Cristo, para idichē'gaca'-nē' nága'gaquiē' Jerusalén ni, para ilácagaquiē' xíguia'.

*Riguíxjö'ē Pablo ca böáquiē' queē' Cristo*

<sup>6</sup> Ní'irō gunnē' Pablo:

—Cate' ni' sa'yéaja' la' nōza, en si' idxina' Damasco, cate' guca idú huagubidza, tsárido'os guyēpi yōsa bení' le za' lúzxiba, le buzení' ga na' sa'yéaja'.

<sup>7</sup> La' yōjōta'tea' lu yu, en biyōnda' chi'i Nu gudxi neda': "Saulo, Saulo, ¿bizx que ribía ládxi'u neda'?" <sup>8</sup> Ní'irō gunábida' lē', gunnía': "¿Nuzxi lí, Xan?" Lē' gudxē' neda': "Neda' ni Jesús, bönni' Nazaret. Neda' caz ribía ládxi'u."

<sup>9</sup> Nupa ni' gula'cuá'len neda' bila'lé'e caz bení' na', en guladxi, pero bití' bila'yōni chi'i Nu na' bulidza neda'.

<sup>10</sup> Ní'irō gudxa'-nē': "¿Nacxi guna, Xan?" Xanru' gudxē' neda': "Guyasa, en guyéaj Damasco. Zoē' ni' tu bönni' guíē' lí' ca naca yúgu'tē le ral-la' gunu'."

<sup>11</sup> Tu' cabirō rilé'eda' tu' budí'i yōsa bení' na' guyēpida' lahua', que lē' ni na' yugu' bönni' dzágagaquiē' neda' gula'guélé'ē na'a, ate' gula'chē'ē neda' ga bidxíntea' Damasco.

<sup>12</sup> Zoē' Ananías ni', tu bönni' runē' idútē ca rinná bē' xibá queē' Dios, ate' yugu' bönni' judío nacu'ē Damasco tunē' lē' bal.

<sup>13</sup> Bidxinē' Ananías na' ga zoa', en gudxē' neda': "Saulo, böcha'a, huōálaj guiōj lo'." La' ní'sō böálaj guiōj lahua', ate' bilé'eda' lē'.

<sup>14</sup> Lē' gudxē' neda': "Dios quégaquiē' xuz xtó'oru', dza ní'te gurō cazē' lí' para inózinu'

le rě'eni quézině' Lě', en ilé'enu'-ně' Bönni' Tshahi', Lě cazě' Zxí'ině', en yönnu' le guié' Lě cazě' li'.  
 15 Caní gaca, tu' ral-la' gunu' ba nalí queě' Lě lógaca yúgu'tě bönachi, usiyönnu' légaquiě' ca naca le chibilé'enu', en le chibiyönninu'. 16 Na'a, ¿bizx que ridzenu'? ¡Guyasa, en bidila nisa! Bulidzě' Xanru' para úně' li' dxi'a, en ugúě' dul-la' nabágu'u."

*Cristo gusöl-lě'ě Pablo para guně' libán lógaca bönachi izá'a*

17 Gunně' ca' Pablo:

—Gudödi ni', cate' budxina' Jerusalén, en tsanni ni' rulidza'-ně' Dios lu chila yudo', bilé'eda' tu le naca ca tu lu yěla běchigal. 18 Bilé'eda'-ně' Xanru', ate' gudxě' neda': "¡Guyéaj carelō! ¡Burúajtě Jerusalén ni, tu' cabí iluně' bal bönni' ni le gunu' ba nalí quia'!" 19 Neda' gudxa'-ně': "Xan, nōzgaca quézině' ca bena' neda'. Guyázia' gapa naca lu yu'u ga tu'dubě' tu'sědě' bönni' judío queě' Dios. Gudina' nupa ni' ta'yéajlě' Li', en gulú'ugaca'-ně' lidxi guié. 20 Cate' ni' gulútiě' Esteban, bönni' ni' beně' ba nalí quiu', lěsca' zoa' neda' ni', en bena' tuz yugu' bönni' gulútiě' lě' tu' ben chi'a lari' nácugaquiě' bönni' na' bulu'ladxě' lě' guiōj." 21 Ní'irō Xanru' gudxě' neda': "Guyéaj, tu' risól-la'a li' lógaca bönachi izá'a."

*Pablo ru'íleně' bönni' lo didza', bönni' rinná bé'eně' bönni' rōjáquiě' gudil-la*

22 Nisō ze lo yugu' bönni' judío bulu'zě nágagaquiě' didza' bě'ě Pablo, ate' ní'irō gula'bōdxi'ě. Gulu'ě zidzaj didza', ta'nně':

—¡Guli'gútiě' bönni' ni! ¡Bíti'rō ral-la' soě' ibaně'!



23 Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös, 24 bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácaté, para ila'nözinë' bizx que na' ta'bödxi'ë bönni' judío caní queë' Pablo. 25 Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchi'a busörö neda' channö nabága'a xíguia'.

26 Cate' bönni' na' biyönnë' lë ni, guyijë' yöjtíxjöi'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

27 Ní'irö bidë' bönni' lo na' ga zoë' Pablo, en gudxë' lë':

—¡Gudixjö'! ¿Naru' nababu' li' Roma?

Pablo gudxë' lë':

—Ön, nababa'.

28 Bubi'ë didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaië' xuz xiná'a Roma.

29 Cate' bönni' na' chizóa ila'guinë' lë' bila'yönnë' lë ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunözinë' nababë' Pablo Roma, tu' chigunná bë'ë ilúguië' lë'.

*Ridxinë' Pablo lógaquië' bönni' yudo' tu'chi'a tu'söröë'*

<sup>30</sup> Dza buropi ni', gú'unne' bönni' lo na' inözinë gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guié na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzóë' lë' lógaquië'.

## 23

<sup>1</sup> Ní'irö buyúdë'ë Pablo lógaquië' bönni' yudo' tu'chi'a tu'söröë' na', en gunné':

—Libí'ili', böcha'a. Ga ridxintë na'a riböza' dxí'ado'. Caní naca, bití' zoa le ruxösa ládxi'da'ahua' neda' lahué' Dios.

<sup>2</sup> Ní'irö Ananías, bixúz lo, gunná bé'enë' nupa nacuá' cuita lë'ë Pablo ila'gápë'ë ru'ë. <sup>3</sup> Pablo gudxë' lë':

—Lëzca' caní Dios ubi'ë quiu', li', ruluí'isö tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

<sup>4</sup> Nupa nacuá' ni' të Pablo:

—¿Naru' rulidza zi'tso'-në' bixúz lo queë' Dios?

<sup>5</sup> Pablo gudxë' légaquië':

—Libí'ili', böcha'a. Nazúaj lu guichi, rnna: “Bití' ulidza zi'u nu rinná be'e bönachi uládz quiu'”, pero neda' bití' gúquibe'eda' náquië' bixúz lo.

<sup>6</sup> Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¡Libí'ili', böcha'a! ¡Naca' bönni' fariseo, en naca' zxi'iné' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

<sup>7</sup> Cate' bē'ē Pablo didza' ni, bila'rúajē' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídžē'ē la' légacasē'. <sup>8</sup> Caní gulunē' tu' ta'nnē' bönni' saduceo na' biti' ulu'bán nupa chinátigaca, en biti' nacu'ē gubáz lá'ayi, en biti' nacuá' bö' nácagaca caz bönachi, pero ta'yéajlē'ē bönni' yudo' fariseo nácagaca yúgu'tē lē ni. <sup>9</sup> Que lē ni na' gula'bödxi'ē. Ní'irö gula'yasē bönni' nazédagaquiē' xibá queē' Dios, yugu' bönni' yudo' fariseo, en gula'dil-la dídžē'ē, ta'nnē':

—Rusáca'tu' queētú' biti' bi dö' nu'ē bönni' ni. Channö tu bö' naca caz bönachi bé'len lē' didza', o channö tu gubáz lá'ayi queē' Dios bé'lenē' lē' didza', biti' ral-la' tá'baga'ru'-nē' Dios.

<sup>10</sup> Cate' chita'díl-lada' dídžē'ē bönni' judío na', gúdxinē' bönni' lo na' rinná bé'enē' bönni' röjáquiē' gudil-la, tu' réquinē' ulu'zxuzxaj ulu'quínnajē' Pablo. Ní'irö gunná bé'enē' bönni' röjáquiē' gudil-la tsöjléajgaquiē' Pablo ladaj bönni' judío na', en ulu'ché'ē lē' lu yu'u zxön ga na' nagá'anagaquiē' bönni' na' röjáquiē' gudil-la.

<sup>11</sup> Cate' chinaca chi'i dzö'ölö la' dza ná'asö, bu-lu'i lahuē' Xanru' ga zoē' Pablo, en gudxē' lē':

—Butipa ládXu'u, Pablo. Ca na' chibenu' ba nalí quia' Jerusalén ni, lēsca' run bayudxi gunu' ba nalí quia' lu yödžö Roma.

### *Tun xtídza'gaquiē' ilútiē' Pablo*

<sup>12</sup> Cate' za' rení' ia'tú dza, gulún xtídza'gaquiē' bal-lē' bönni' judío, en gulún tsutsu xtídza'gaquiē',

ta'nnë' gunë' Dios légaquië' xíguia' channö cabí ilunë' lë na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo. <sup>13</sup> Nayanrö ca choá'gaquië' bönni' na' gulún tsutsu xtídza'gaquië' caní. <sup>14</sup> Yöjáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Biti' guí'aj gágutu' ga gútirötu'-në' Pablo. <sup>15</sup> Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' röjáquië' gudil-la idichë'ë Pablo cuxö para idxinë' ga nudúbili', innali' ré'ënili' inábili'-në' Pablo tu didza' gate ga ré'. Netu' cö'ö nistu'-në' la' nöza, ate' gútitu'-në' zí'alö ca idxinë' ni.

<sup>16</sup> Biyönibi' bi'i bönni' queënu nigula zanë' Pablo ca na' ila'bö' nísie' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-në' Pablo. <sup>17</sup> Pablo bulidzë' tuë' bönni' nacu'ë lu në'ë bönni' röjáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

<sup>18</sup> Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulídzë' Pablo, bönni' na' yu'ë lidxi guié, neda', en gúta'yue' lahua' idigu'a-bi' bi'i ni lo', tu' ré'ëni'bi' güi'ilenbi' li' didza'.

<sup>19</sup> Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

<sup>20</sup> Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxõ, para idxinë' lógaquië' bönni' yudo' tu'chi'a tu'söröë'. Ilé' li' té'ënnë' ila'nábinë' lë' tu didza' gate ga rë', <sup>21</sup> pero bitì' tséajlë'u le ila'nnë' tu' nadödi choá'gaquië' ila'bõ' nísie' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Bitì' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

<sup>22</sup> Ní'irö bönni' lo na' rinná bé'enë' bönni' röjáquië' gudil-la gunná bé'enë'-bi' cuntu nu guiëbi' lë na' chigúdxibi' lë', ate' ní'irö busöl-lë'ë-bi' bi'i ni.

*Ridxinë' Pablo lahuë' Félix, bönni' rinná bë'ë luyú na'*

<sup>23</sup> Ní'irö bönni' lo na' bulidzë' chopë' bönni' nacu'ë tu gáyu'ë bönni' röjáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' röjáquië' gudil-la ta'zë'e ní'agaquië', en tsónnalalaj yu' chië' bönni' röjáquië' gudil-la dxíagaquië' böa', en chopa gáyu'ë bönni' röjáquië' gudil-la ilu'ë yaga tuchi' para tsöjáquië' yödzö Cesarea idú ridödi xtsö'. <sup>24</sup> Lësca' gunná bé'enë' légaquië' ulu'cözë'-ba' tu böa' cuíë'-ba' Pablo, ate' ila'chë'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

<sup>25</sup> Gusöl-lë'ë ca' tu guichi le rnna caní:

<sup>26</sup> “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

<sup>27</sup> 'Bönni' ni risöl-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda'

nababë' Roma, guchë'gaca'-në' bönni' röjáquië' gudil-la, en busölá'-në' lu ná'agaquië' judío na'.  
<sup>28</sup> Gú'unida' inözda' bizxi benë', lë' na' tu'zëguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söröë' légaquië'.  
<sup>29</sup> Cate' buédxi didza', gunözda' tu'zëguië' lë' didza' ca naca le rinná bë' xibá quégaquië', en biti' bi nabáguë'ë bönni' ni para nu guti lë', o nu cu'u lë' lidxi guié.  
<sup>30</sup> Ní'irö cate' bidxín nu gudíxjö'i neda' ta'bö' nísie' yugu' bönni' judío lë', la' gusól-la'tea' lë' ga zu', ate' gunná bé'egacada'-në' bönni' ni tu'zëguië' lë' didza' ila'dxinë' lo' li', para ila'guíxjö'i'në' li' bi didza' nápaqaquië' lë'. ¡Dios gun tsáhuë'ë li'!"

<sup>31</sup> Ní'irö bönni' na' röjáquië' gudil-la gula'guélë'ë Pablo, en gulunë' ca na' chigunná bé'enë' légaquië', ate' gula'chë'ë lë' yödzö Antípatris, ni' naca chi'i dzö'ölö.  
<sup>32</sup> Cate' za' rení' ia'tú dza bönni' röjáquië' gudil-la ta'zë'e ní'agaquië' yöjhuöjgaquië' Jerusalén, ate' bönni' röjáquië' gudil-la dxiagaquië' böa' bulu'ú'ë nöza, dzágagaquië' Pablo.  
<sup>33</sup> Cate' bönni' na' röjáquië' gudil-la nachë'gaquië' Pablo bila'dxinë' Cesarea, bulu'nödzjë' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'.  
<sup>34</sup> Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia,  
<sup>35</sup> gudxë' lë':

—Yönida' le innó' cate' ila'dxín ni nupa tu'zëgui li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

*Pablo ru'ë didza' uláz queë' lahuë' Félix*

<sup>1</sup> Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazë'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo. <sup>2</sup> Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bë', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queëtu'. <sup>3</sup> Yúgu'të lë ni ruzi'tica'stu' xibé gáti'tës, ate' idú ládxi'tu' rëtu' li': "Xclenu'." <sup>4</sup> Na'a, para cabí upízxjarötu' li', ráta'yua' lo' gun zxön ládxi'u, yönnu' tu le do' guíëtu' li'. <sup>5</sup> Gúquibe'etu' bönni' ni rigú'u yöl-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë idútë yödzölió, en náquië' bönni' lo quegaquië' bönni' dá'gaquië' bönni' Nazaret na'. <sup>6</sup> Lësca' gú'unnë' gun dítjanë' yudo' queëtu'. Que lë ni na' guzxöntu'-në', en gú'unitu' uchi'a usörötu' lë' ca naca xibá queëtu'. <sup>7</sup> Ní'irö Lisias, bönni' lo rinná bé'enë' bönni' röjáquië' gudil-la bidxinë' ga zóatu', en lu yöl-la' sínia' zxön bugúë' bönni' ni lu na'tu'. <sup>8</sup> Ní'irö gunná bé'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inözinu' gate ga rë' yúgu'të lë ni ruzéguitu' lë' didza'.

<sup>9</sup> Lësca' caní gula'nnë' yugu' bönni' judío ni', gula'nnë' naca caz caní. <sup>10</sup> Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubí'ë didza', gunné':

—Idú ládxa'a quíxjö'a ca naca le runa', tu' chinaca zián iz ruchí'a rusöröu' le raca quégaca bönachi ladztu'. <sup>11</sup> Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios. <sup>12</sup> Biti' yöjxáca'gaquië' neda' nu ridíl-lalena' didza', en bití' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sëdë' queë' Dios, en cabí lu yödzö. <sup>13</sup> Biti' ca' gaca ulu'béaj lië' yugu' lë ni tu'zéguië' neda' didza'. <sup>14</sup> Lë ni rixóalëpa' lo'. Ca runa' xichiné' Dios quégaquië' xuz xtó'otu' nalëbi ca le tu'sëdinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. <sup>15</sup> Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi bití' nácagaca tsahui'. <sup>16</sup> Que lë ni na' ruí'i ládxi'tica'sa' cabí ibága'a le gun ga uxös ládxi'da'ahua' neda' lahuë' Dios o lógaca bönachi.

<sup>17</sup> 'Gudödi zoa' ga yúbölö idú chopa tsonna iz, budxina' ga nacué' bönachi uládz quia' para unödza' dumí le gácalen bönachi yechi', en unödza' le rigu'a lahuë' Dios. <sup>18</sup> Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuína' ca naca que yudo', en cabí nutuba' bönachi zián, en cabí nuna' ga ulu'tsatsa bönachi. <sup>19</sup> Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápagaquië' neda' didza'. <sup>20</sup> Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógaquië' bönni' yudo' tu'chí'a tu'söröë'



légaquië'. <sup>21</sup> Tuz cate' ni' zoa' lógaquië', bë'a zidzaj didza', gunniá': "Ruchi'a rusöröli' neda' na'a tu' runa' löza ulu'bán nupa chinátigaca."

<sup>22</sup> Cate' biyönnë' Félix didza' ni, en dxí'ado' chinözinë' ca naca que lë na' rusédinë' Pablo, buzë lähui'së' ca' didza' bizxaj ni, gunnë':

—Cati' idxinë' Lisias, bönni' lo rinná bé'enë' bönni' röjáquië' gudil-la, údxi yönida' ca naca didza' bizxaj queéli'.

<sup>23</sup> Ní'irö Félix gunná bé'enë' tu bönni' nacu'ë lu në'ë bönni' röjáquië' gudil-la zoë' ni', gun chi'ë Pablo, pero gu'ë lé' lataj tē' lö'a, en biti' uzáguë'ë xinözgaquië' böchi' luzë'ë duyúgaquië' lé' bi dxin ilunë' queë'.

<sup>24</sup> Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguië' xtídzë'ë ca naca le réajlë'ëru' Jesucristo. <sup>25</sup> Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

<sup>26</sup> Lësca' gú'unnë' Félix si'ë dumí le unödzejë Pablo lë' para usanë' lë', ate' que lë ni na', zían luzuí bulidzë' Pablo, en bë'lenë' lë' didza'. <sup>27</sup> Cate' bizá'a chopa iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guié.

## 25

*Ridxinë' Pablo lahuë' Festo, bönni' unná bë'*

<sup>1</sup> Bidxinë' Festo yödzo Cesarea para tsázië' xilatjé', gáquië' bönni' unná bē' ulaz que Roma. Cate' bizá'a tsonna dza buzé'ë yödzo na', sa'yéajë' Jerusalén. <sup>2</sup> Cate' bidxinë' Festo ni' yugu' bixúz unná bē', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' gulá'tayuë' lahuë' Festo <sup>3</sup> bi uzá' ládxe'ë quégaquië', isól-lë'ë nupa tsöjxí'gaca Pablo, para udxinë' Jerusalén. Gul'é'ënnë' ila'bö' nísie' lë' la'nöza para ilútië' lë'. <sup>4</sup> Bubi'ë didza' Festo, gudxë' légaquië':

—Lu yödzo Cesarea nadzunë' Pablo, ate' ralla' tseja' ni' cuxó huidzaj nisö. <sup>5</sup> Que lë ni na', nútí'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'në' didza' ni'.

<sup>6</sup> Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia'tú dza gurö'ë ga ruchí'a rusöröë', en gunná bé'enë' nupa tsöjxí'gaca Pablo. <sup>7</sup> Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', però biti' guca ulu'béaj lië' yugu' lë na' gula'nnë' queë'. <sup>8</sup> Ní'irö bē'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

<sup>9</sup> Gú'unnë' Festo gunë' le ila'yaza ládxi'gaquië' bönni' judío, ate' bubi'ë didza', gudxë' Pablo:

—¿Rë'ënu' so'o Jerusalén, ga na' soa nu uchi'a usörö li' ca ná'cagaca lë ni ta'nnë' quiu'?

<sup>10</sup> Bubi'ë didza' Pablo, gudxë' lë':

—Zoa caza' ga rō'ō nu ruchi'a rusörō uláz queë César, ga na' ral-la' uchi'a usörōu' neda'. Biti' bi huiá' dō' nuna' quégaquië' bönni' judío, ate' chinöz quézinu' lë ni. <sup>11</sup> La'tu' nuna' tu le ruá' dō', o bítitës le run ga ibága'a xíguia' gátia', bití' tá'baga'a gátia'. Na'a, channō cabí nuna' ca ta'nnë' quia' bönni' ni, cuntu caz nu dë lu në'e udödi neda' lu ná'agaquië'. Rinaba' tseja' lahuë' César ga udxí'a urō quia'.

<sup>12</sup> Cate' Festo chibë'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

*Ru'ë didza' Pablo lahuë' Agripa, bönni' unná bë'*

<sup>13</sup> Gudödi chopa tsonna dza, bidxinë' Agripa, bönni' rinná bë'ë lu yödzō Cesarea, dzáganu Berenice lë', duyúgaquië' Festo. <sup>14</sup> Cate' chigula'cu'ë ni' zían dza, Festo buluí'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni bucá'anë' Félix lë' lidxi guié.

<sup>15</sup> Cate' guzóa' Jerusalén, yugu' bixúz unná bë', en bönni' gula tu'zëajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátie'. <sup>16</sup> Neda' bubí'a didza', gudxa' légaquië' bití' nalëbiguequinë' bönni' Roma ila'chúguië' queë' tu bönni' gátie' channō cabí ila'dxini lahuë' nupa tu'zegui lë' didza', para gaca ubi'ë didza' ca naca lë' na' ta'nnë' queë'.

<sup>17</sup> Que lë' ni na', cate' bila'dxinë' légaquië' ni, bití' ca' gudzedá', pero cate' guzá' guyeaní' ia'tú dza gurō'a ga ruchi'a rusörōa', ate' gunná bé'eda' nupa yöjxí'gaca bönni' ni. <sup>18</sup> Cate' gula'cu'ë ni bönni' na' tu'zëguië' lë' didza', bití' bi gula'nnë' queë'

ca busaca' quia' ila'nně'. <sup>19</sup> Gula'nně' queě' bal-la didza' bizxaj ca naca le ta'yéajlě'ē Dios, en ca naca queě' tu bönni' lě' Jesús, nu na' guti, pero Pablo runě' tsutsu xtídzě'ē rnně' ni zoě' nabaně' leyúbölö. <sup>20</sup> Tu' buchíxida' ca nácagaca lě ni, gunábida'-ně' Pablo channö rě'ēně' tsejě' Jerusalén, ga ni' soa nu uchi'a usörö lě' ca nácagaca lě ni. <sup>21</sup> Ní'irö cate' gunabě' Pablo tsejě' lahuě' Augusto César para uchi'a usöröě' lě' ni', gunná bé'eda' bönni' röjáquiě' gudil-la ilún chí'igarě' lě' cate' gála'rö dza isöl-la'a-ně' lahuě' César.

<sup>22</sup> Ní'irö Agripa gudxě' Festo na':

—Lězca' neda' rě'ēnda' yónida' le inně' bönni' na'.  
Festo gudxě' lě':

—Cuxó yönnu' le inně'.

<sup>23</sup> Cate' za' rení' ia'tú dza, len ba zxön bila'dxině' Agripa, en Berenice ni'. Gula'yáziě' ga ral-la' ilu'ē didza', dzágagaquiě' légaquiě' bönni' unná bě', ate' gula'söl-lě'ē nupa tsöjxí'gaca Pablo. <sup>24</sup> Ní'irö Festo gudxě' Agripa, bönni' unná bě':

—Bönni' unná bě', Agripa, en yúgu'těli' zóali' ni tsözxön len netu'. Ni zoě' rilé'eli'-ně' bönni' na', ta'nně' queě' yúgu'tě bönni' judío nacu'ē Jerusalén, enca' nupa nacuá' ni, tě' neda' ral-la' gátiě'. <sup>25</sup> Runi neda' bití' bi beně' le nabáguě'ē xíguia' gátiě', pero tu' gunabě' lě' cazě' tsejě' ga uchi'a usöröě' Augusto César lě', que lě' ni na' chinuna' quia' isöl-la'a-ně' lahuě' Augusto. <sup>26</sup> Tu' cabí' nözda' bi ral-la' uzúaja' lu guichi le uzegui bönni' ni didza' para isöl-la'a lu ně'ē César, xana', que lě' ni na' nachě'a-ně' loli', en le nácáro lo, nachě'a-ně' lo' li', Agripa, bönni' unná bě', para cate' údxi rinábini yudxu'-ně', ní'irö inözda' bi ral-la' uzúaja' lu guichi ca naca queě'

bönni' ni. <sup>27</sup> Réquida' biti' naca dxi'a isöl-la'a-në' nu bönni' náguë'ë ni' channö cabí gaca ulu'a le nabáguë'ë.

## 26

*Didza' bë'ë Pablo uláz queë' lahuë' Agripa, bönni' unná bë'*

<sup>1</sup> Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

<sup>2</sup> —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'. <sup>3</sup> Raza ládxi'ra' tu' núnbë'u yúgu'të le nalëbiguequinë' tunë' bönni' judío, enca' yugu' lë ni ridíl-latu' didza'.

*Yugu' le benë' Pablo zí'atëlö*

<sup>4</sup> Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuídia' ga nacuá' bönachi uládz quia', enca' lu yödzö Jerusalén. <sup>5</sup> Nözguequi quézinë' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tu'i ládxi'gacarë' ila'yéaj ládxi'gaquië' Dios ca tunë' ia'zica'rë' bönni' judío. <sup>6</sup> Na'a, zoa' ni lolí' para nu uchí'a usörö neda' tu' runa' löza Dios, usubanë' bönni' nati, en gunë' ca na' guzxí' lu në'ë lógaquië' xuz xtó'otu'. <sup>7</sup> Tunë' löza yugu' bönni' idxinnu cō di'a dza queëtu' ila'déli'në' lë na' guzxí' lu në'ë Dios. Que lë ni na' ta'yéaj ládxi'gaquië' Dios, en tunë' xichinë' rëla, en tē dza. Tu' runa' löza lë ni, nuzéguigaquië' bönni' judío neda'. Caní naca, bönni'

unná bē', Agripa. <sup>8</sup> Na'a, ¿naru' réquitseli' libí'ili' biti' naca le tséajlë'ëru', usubanë' Dios bönni' nati?

*Pablo gudxía ládxe'ë bönachi queë' Cristo*

<sup>9</sup> Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret. <sup>10</sup> Caní bena' lu yödzo Jerusalén. Gulu'a zían bönachi ta'yéajlë' Jesús lidxi guié, tu' bulu'dödë' yugu' bixúz unná bē' lu na'a yöl-la' unná bē'. Cate' gulútië' bönachi ni', bënlena' légaquië' tuz didza'. <sup>11</sup> Zían luzuí busaca' zí'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sëdë' queë' Dios. Guléde'eda' légaquië', ate' gudxía ládxa'a légaquië' ga bidxintë' guyija' gapa nacué' yödzo zí'tu' para tsöjxöngaca'-në'.

*Rigúxjö'ë Pablo ca böáquië' queë' Cristo*

<sup>12</sup> Gunnë' ca' Pablo:

—Para guna' caní guyija' yödzo Damasco, ate' bixúz unná bē' nasól-la'gaquië' neda' nudödigaquië' lu na'a yöl-la' unná bē'. <sup>13</sup> Caní guca, bönni' unná bē', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúzxiba le buzení'rö ca gubidza. Buzení' ga na' zoa', en ga nacué' nupa söjácálen neda'. <sup>14</sup> Ní'irö yúgu'tëtu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunnë': "Saulo, Saulo, ¿bixx que ribía ládXu'u neda'? Run zí' cuinu', ridá'bagu'u neda'. Raca quiu' ca raca queë'ba' bëdxi, run zí' cuinba', richégu'ba' yaga tuchi' le túndë'ë-ba' zí'." <sup>15</sup> Ní'irö gudxa'-në': "¿Nuzxi li', Xan?" Xanru' gudxë' neda': "Neda'

ni Jesús, Nu na' ribía ládXu'u. <sup>16</sup> Na'a, guyasa, en guzuí, tu' buluí'i lahua' li' na'a, para uzó'a' li' gunu' xichina', en gunu' ba nalí que lë ni chibilé'enu', enca' quégaca le uluí'ida' li', uluí'i lahua' ga zu'. <sup>17</sup> Usölá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la'a li' na'a. <sup>18</sup> Risöl-la'a li' ga na' nacu'ë para gunu' ga ulu'huóalaj guiöj lógaquië', en ulu'huóáquië' queë' Dios, en ulu'cá'anë' le naca chul-la que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlë'ë neda', Dios uniti lahuë' légaquië', en ugúë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

*Benë' Pablo ca naca le buluí'inë' Xanru' lë'*

<sup>19</sup> Gunnë' ca' Pablo:

—Qui lë ni na', bönni' unná bë', Agripa, biti' gudá'baga'a guna' le buluí'inë' Dios, zoë' yehua' yubá, neda'. <sup>20</sup> Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzö zi'tu' para ulu'bí'i ládxi'gaca, en ulu'huóáca queë' Dios, en ilún le ilaca bë' chibulu'bí'i ládxi'gaca. <sup>21</sup> Tu' bena' caní, yugu' bönni' judío gula'zönë' neda' cate' ni' zoa' ló'a yudo', en gulë'ënnë' ilútië' neda'. <sup>22</sup> Ní'irö gúcalenë' Dios neda', ate' ga ridx-intë na'a dza zoa' idúládxa'a, runa' ba nalí lógaquië' bönni' cá'asö, en lógaquië' bönni' lo. Biti' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. <sup>23</sup> Gula'nnë': "Qui'i sáquë'ë Cristo, en tödi gátië', gáquië' nu isí lo ubán tsaz

lu yöl-la' guti, para ulu'ë lahui naca löza ila'dxín bönachi lataj beni', en gaca libán que lë ni lógaca bönachi uládz queëtu', enca' lógaca bönachi izá'a."

*Pablo ruzéajni'inë' Agripa para tséajlë'ë Cristo*

<sup>24</sup> Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

<sup>25</sup> Ní'irö Pablo gudxë' lë':

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'. <sup>26</sup> Lë cazë' Agripa, bönni' ni rinná bë'ë, nõzinë' yugu' lë ni, en que lë ni na', idú ládxa'a ruá'a didza' lahuë' lë'. Nõzinë' yugu' lë ni, tu' cabí guca bagáchi'sö lë na' guca. <sup>27</sup> Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

<sup>28</sup> Ní'irö Agripa gudxë' Pablo:

—Ia'látisö la' réquinu' idéli'nu' neda' para gaca' queë' Cristo.

<sup>29</sup> Pablo gudxë' lë':

—Ni'a queë' Xanru' Dios ré'ënda', sal-la' ia'látisö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guié ca ni nága'a neda'.

<sup>30</sup> Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa rölengaca légaquië'. <sup>31</sup> Cate' bila'rúajë' quez, gulu'í xtídza'gaquië', ta'nnë':



—Biti' bi nunë' bönni' ni le nabáguë'ë xíguia' gátië', en calëga tsázië' lidxi guië'.

<sup>32</sup> Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

## 27

### *Ta'söl-lë'ë Pablo yödzö Roma*

<sup>1</sup> Cate' chigulunë' quégaquië' ila'söl-lë'ë netu' lë'e barco para tséajtu' yödzö Roma, luyú Italia, gula'guélé'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' röjáquië' gudil-la nazí'i le: Bönni' Queë' Augusto Röjáquië' Gudil-la. <sup>2</sup> Gurentu' tu lë'e barco que luyú Adramitio, le ral-la' tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguië' netu'. <sup>3</sup> Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bé'enë' bönni' röjáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'. <sup>4</sup> Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'. <sup>5</sup> Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

<sup>6</sup> Bönni' na' rinná bé'enë' bönni' röjáquië' gudil-la, en nachë'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj

luyú Italia ga rö' yödzö Roma. Gulu'ë netu' lë'e barco na'. <sup>7</sup> Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzö Salmón luyú Creta na'. <sup>8</sup> Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

<sup>9</sup> Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië', <sup>10</sup> rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

<sup>11</sup> Bönni' na', rinná bé'enë' bönni' röjáquië' gudilla, guyéajlë'erë' le gula'nnë' bönni' na' dë lu në'ë barco, en bönni' xan caz, ca le gunné' Pablo. <sup>12</sup> Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqui' yúgu'të bönni' nacu'ë lë'e barco na' gulún tuz xtídzaga'quië' ulu'zë'ë ni', channö huáca ila'dxinë' ga ta'dxín barco lu yödzö Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulë'ënnë' ulu'gá'anë' ni' yugu' beo' ziaga.

*Recja bö' budunu' lu nísado'*

13 Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca té'ennë', ate' bulu'lisë' guië zi'i naga' du guië le ruzóa dxisö barco, ate' gudödi barco na' gala' ra' luyú bidxi na' nazí'i le Creta. 14 Ia'tú chí'isö ca', guyecja tu bö' budunu' za' lotu', nazí'i le Euroclidón. 15 Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga ré'ëni. 16 Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga biti' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'. 17 Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzötjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco. 18 Cate' za' rení ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. 19 Dza bunny, len na' cuintu' gurú'unatu' le tun dxin que barco na' lu nísado'. 20 Cate' chiguca zían dza biti' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

21 Tu' chiguca zían dza biti' nágutu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönni', dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni. 22 Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili'

tscali' zóali' ni, sal-la' gaca ditaj barco ni. <sup>23</sup> Caní gaca tu' budulu'i lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'. <sup>24</sup> Gubáz lá'ayi na' gudxë' neda', gunné': "Pablo, biti' gádxinu'. Run bayudxi idxinu' lahuë' César. Tu' nadxí'inë' Dios li', usölë' yúgu'të bönachi nacuá'len li' lë'e barco ni." <sup>25</sup> Que lë ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë' neda'. <sup>26</sup> Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

<sup>27</sup> Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. <sup>28</sup> Gula'ró'unë' du lu nísado' na', ate' gula'nözinë' galaj ösa naca ga bidxintë ga rë' lu nisa. Cate' gudödi barco na' ia'látido', gula'ró'unë' du na' leyúbölö, en gula'nözinë' chinaca chinu ösa. <sup>29</sup> Tu' guládxinë' tsöjdín barco na' lu guiöj, que lë ni na', tsölá'a láhuilö que barco gula'ró'unë' lu nísado' tapa guië zi'i nága'gaca du guië le tu'zóa dxisö barco lu nisa. Lu yöl-la' ruúbi ruguí'sö ládxi'do'gaquië' gula'bözë' tsení'. <sup>30</sup> Ní'irö gulé'ënnë' bönni' tunë' dxin lu barco ulu'zxúnnajë' lë'e barco na'. Bulu'zötjë' bárcodo' na' dë lahui barco zxön na' lu nísado'. Gulunë' ca té'ënnë' ilu'ë ia'lati' zitu' guië zi'i na' naga' du guië le ruzóa dxisö barco na', le zoa saca' tsölá'a láhuilö. <sup>31</sup> Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxön len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni,

biti' gaca uláli'.

<sup>32</sup> Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

<sup>33</sup> Cate' chizá' rení', Pablo gúta'yuë' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'. <sup>34</sup> Que lë ni na', ráta'yua' loli' gáguli' para huöáca ládxi'li', tu' cabí gátili' nituli' libí'ili'.

<sup>35</sup> Cate' Pablo budxi bë'ë didza' ni, gudélëë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzuzxjë' yöta xtila na', en gusí lahuë' rahuë'. <sup>36</sup> Ní'irö bila'dipa ládxi'gaquië' yúgu'të', en gulahuë'. <sup>37</sup> Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chixzópatu'. <sup>38</sup> Gudödi gulahuë', en bulu'huöljanë', ní'irö gula'ró'unë' zxoá' xtila dë lë'e barco na' lu nisa, para ulu'lahuë' yua' dzö'ö lë'e barco na'.

### *Raca ditaj barco lu nísado'*

<sup>39</sup> Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lë'enë' ga röjrö' nisa zxon na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'. <sup>40</sup> Ní'irö bulu'sedxë' yugu' du guíë nága'gaca yugu' guíë zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco

saca' ga röjrö' nísado' gatsaj láchui'lö luyú bidxi na'.  
<sup>41</sup> Cate' bidxín barco na' tu lataj ga ridzaga chopa nisa, ni' binidxi' tsölá'a láchuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúde'lö barco na', gusí lo riguitsaj nísado' na' le, len yöl-la' rizá' que. <sup>42</sup> Ní'irö bönni' röjáquië' gudil-la gulë'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'. <sup>43</sup> Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabí ilunë' ca na' té'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi. <sup>44</sup> Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láchuilö barco, en ia'bal-lë' láchuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

## 28

### *Le benë' Pablo luyú bidxi nazí'i le Malta*

<sup>1</sup> Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta. <sup>2</sup> Bönni' xidza' nacué luyú bidxi na' lu yöl-la' dxi'i ladxi' quégaquië' gulunë' netu' bal. Gula'béquië' guí, ate' bulu'lidzë' netu' yúgu'tëtu' iditsë'e cuintu', tu' ralaj guiöj, en runda' ziaga. <sup>3</sup> Ní'irö Pablo gúché'ë tu tsölén huága zxisi bídxido', en cate' gulu'ë le lu guí, birúajba' tuba' bëla sínia' lë'e huágado', rizxúnnajba' böchila que guí na', ate' yöjtí'iniba' yen në'ë Pablo. <sup>4</sup> Cate' bönni' xidza' na' bila'lé'enë' bëla na', nála'ba' yen në'ë Pablo, gulë' tuë' ia'tué':

—Le nácatë bönni' ni náquië' nu ruti bönachi. Sal-la' bulë' lu nísado', dios queëru' lë' Tsahui' biti' ru'ë lë' lataj soë' ibanë'.

<sup>5</sup> Gudxibi në'ë Pablo, en busládzu'ë-ba' bëla sínia' na'. Yöjxóatëba' lu gui', ate' lë' biti' bi guca queë'. <sup>6</sup> Bönni' xidza' nacu'ë ni' tu'yüë' Pablo, bátacalö cö'ë gui, o tsö'ötë' gátie'. Ní'irö cate' chigudzé ta'bözë', en bila'lé'enë' biti' bi raca queë', ia'tú le guléquinë', ate' gula'nnë' naca cazë' tu dios.

<sup>7</sup> Lataj ní'isö dë xiyüë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza. <sup>8</sup> Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyüë' lë', en gudödi bulidzë' Dios, ní'irö guxóa në'ë bönni' huë' na', en bunë' lë'. <sup>9</sup> Tu' benë' Pablo lë ni, lësca' bila'dxín nupa te'e ga zoë', nacuá' luyú bidxi ni', en bulu'huóáquië'. <sup>10</sup> Yugu' bönni' ni gulunë' netu' bal, en zían le gulunë' queëtu'. Cate' chizóa uzá'atu' luyú ni', bulu'nödzejë' yugu' le naquíniu' queëtu'.

### *Ridxinë' Pablo lu yödzö Roma*

<sup>11</sup> Cate' chiguca tsonna beo' zóatu' ni', ní'irö gurentu' tu lé'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga lëguequi Cástor, en Pólux, dios bilidi' quégaca bönachi Alejandría na'. <sup>12</sup> Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza. <sup>13</sup> Buzá'atu' ni', ate' gudöditu' tsölá'alö luyú ni', en bidxintu' yödzö Regio. Cate' za' reni' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntëtu' yödzö

Puteoli luyú Italia. <sup>14</sup> Lu yödzo na' yöjxáca'tu' yugu' böchi'ru' ta'yéajlë'ë Cristo, ate' guláta'yuë' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzo Roma, rizë'e ní'atu'. <sup>15</sup> Chibila'yönnë' böchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzo do' nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxe'ë, en gudxe' Dios: "Xclenu'."

<sup>16</sup> Cate' bidxintu' Roma, bönni' na' rinná bé'enë' bönni' röjáquië' gudil-la, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjáquië' gudil-la, ate' bë'ë Pablo lataj soë' queëzë', zóalenë' lë' tu bönni' rejë' gudil-la ruyüë' lë'.

### *Runë' Pablo libán lu yödzo Roma*

<sup>17</sup> Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dübë' ga na' zoë' Pablo, lë' gudxe' légaquië':

—Libí'ili', böcha'a, sal-la' biti' bi bena' quégaca bönachi ládzarú', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guié'. <sup>18</sup> Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' gulé'quibe'enë' biti' nabága'a xíguia' gátia'. <sup>19</sup> Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba'



tseja' lahuë' César ga uchi'a usöröë' neda', en calëga para uzëguia' bönachi uládz queëru' didza'. <sup>20</sup> Que lë ni na' bulidza' libí'ili' para ilé'eda' libí'ili', en güí'ilena' libí'ili' didza', tu' nága'a du guié' ni tu' runa' löza le runru' löza rë'u, bönachi Israel, gácatë lë na' guzxi' lu në'ë Dios gata' queëru'.

<sup>21</sup> Ní'irö légaquië' gulë' Pablo:

—Biti' ridxini queëtu' guichi le za' luyú Judea ca naca lë na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnnë quiu' le ruá' dö'. <sup>22</sup> Na'a, rë'ënitü' yönitü' xtídzü'u, lë na' riguinnaj icju', tu' chinözitu' ta'nnë bönachi yúgu'të lataj quégaca nupa nazí' lu në'eguequi xibá cubi ni.

<sup>23</sup> Caní guca, bulu'dxië' bë' tu dza, ate' dza na' bila'dxinë' zianë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gü'unnë' ulu'inë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios. <sup>24</sup> Bal-lë' gula'zì' lu ná'agaquië' didza' bë'ë Pablo, pero ia'bal-lë' biti' ca' gula'yéajlë'ë. <sup>25</sup> Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë na' gunnë' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunnë':

<sup>26</sup> Guyéaj lógaca bönachi ni', yöjödxi légaquië':

Yöni nágali', pero biti' tséajni'ili'.

Uyuli' iná'ali', pero biti' ilé'eli'.

<sup>27</sup> Yugu' bönni' ni chinazidi icja ládxi'do'gaquië',

en biti' bi riyaza icja nágagaquië'.  
 Gulunë' ca tun nupa nachul-la guiöj lóguequi  
 para cabí ila'lé'e len guiöj lóguequi,  
 en cabí ila'yöni nágaguequi  
 para cabí ulu'zéajni'i ládxi'guequi,  
 en cabí ilé'ëni ulu'huóaca queë' Dios  
 para gaca una' léguequi.

<sup>28</sup> Na'a, ral-la' inözili' lë ni. Dios risöl-lë'ë netu'  
 lógaca bönachi izá'a para ulu'lágaca, ate' légaquië'  
 ila'yönnë'.

<sup>29</sup> Cate' Pablo budxi bë'ë didza' ni, bila'rúajë'  
 bönni' judío, ta'díl-lada' dídze'ë la' légacasë'.

<sup>30</sup> Idú chopa iz bugá'anë' Pablo ni', zoë' tu lu  
 yu'u ga na' riguízxië', ate' benë' bal yúgu'të nupa  
 buduyúgaca Lë'. <sup>31</sup> Lu yöl-la' rugu ladxí' benë' libán  
 ca rinná bë'ë Dios. Busédinë' bönachi ca naca queë'  
 Xanru' Jesucristo, ate' cuntú nu buzaga' xinözë'.  
 ¡Ca' naca!

**Didza' cubi rucá<sup>1</sup>ana tsahui'**  
**New Testament in Zapotec, Rincón (MX:zar:Zapotec,  
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Rincón

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25